

1 REYES

Apobo yoií iká rekana kirika

David yosia

1 ¹Ja apo Davidhra iká iki moa yosi-shoko, itan bebonhira baritiaya. Kikinhakin chopan rakokanabira xana-yamaa iki.

²Jaskákinra, jawen yonotibaon yoia iki: “Mia jan akinti itan mia koiranti, westíora xontako beneoma non mia benaxonbanon, jatianra miibetan oxaxon mia xanaati iki”, akin.

³Jatianra ja Israel mainmea jatíbiain westíora metsá xontako benakana iki, jatianra westíora nokokana iki, jawen jane iká iki Abisag, Sunem jemamea, jara apo boxonkana iki.

⁴Ja Abisag iká iki kikin metsáshoko, janra apo koirana iki, jainxonra jawéki axona iki, ikaxbira jawetianbi apon já yoranyamaa iki.

Adonías apo ikasa

⁵Jatianribira Davidkan Haguit betan bakea Adonías, jaki jakonmai peokooti, eara apo ikai, iki iká iki. Janmeax reteananti carrobora bia iki, cabayoninmeax reteananti jonibo, itan já koiranai itibora, pichika chonka joni bia iki.

⁶Jawen papanra, jawetianbi jaskara ayamawe akin ayamaa iki, ja min akaiki, jaweati min jaskáai akinra yokáyamaa iki, Adoníassa iká iki Absalón pekáo pikota, kikin metsá joni.

⁷Sarvianin bake, Joab, itan sacerdote Abiatar betanra, jaskara ati shinan aká iki, jaskákinra jabaon akinna iki.

⁸Ikaxbira ja sacerdote Sadocnin, ja Joiadanin bake Benaíassen, nin profeta Natánman, nin ja apo jaki koshia joni

Simeikanbi, jainoax ja David koirannai sontárobaonbi Adonías akinyamakana iki.

⁹Jaskánontianra, Adoníasnin tsinkíxon aniakin jawékiati aká iki, ja Roguel jene jokonai iká ochóma, Zohélet shanka patáxon. Carnerobo betan waka benebora jato retemaa iki, waka bene ramakaya aniai kikin xoáboribira aká iki, jaskáaxonra jawen wetsabo, ja apon bakebo, jainoax jatíbi Judáinoapo tee axonai joniboribi jato kenaa iki;

¹⁰ixonbira profeta Natán, Benaías, ja David koirana sontárobo, jawen wetsa Salomón, jatíbi jabo jato kenayamaa iki.

¹¹Jatianra Natán Salomónman tita Betsabé betan yoyo ika iki, jatianra yoia iki: —¿Minki moa ninkata, Haguitnin bake Adonías, non ibo David onanmayamai moa apo iká?

¹²Neri jowé, min bake Salomón betanbi mia jaskatax jati kopi en mia esenon.

¹³Apo Davidhiba kaxon, neskáakin yoitanwe: ‘Minra ja akonkin senenhati ixon yoia iki, mia iká pekáo nokon bake Salomón apo itaan, ani yakátinin yakáxon jato ikinti. ¿Jatian jawekopíki, Adonías moa apo iká?’ akin.

¹⁴Jaskati apo betan mia yoyo ikaitianra, ea jikiti iki, jatianra min yoia joibora ikon iki ixon en yoiti iki —akin aká iki.

¹⁵Jatianra Betsabé apo betan yoyo iki, jain iká chitéain kaa iki. Ja apora moa yosiora iká iki, sunamita xontako Abisagnin koiranna.

¹⁶Betsabéra apo bebon main bekepinon kaman beota iki, jatianra apon yokata iki: —¿Jawe en axontininki mia keenai? —akin.

¹⁷ Jatianra jan yoia iki: —Min Ibo Diossen janenko, akonkin senenhati ixonra, min ea yoia iki, mia iká pekáo ja nokon bake Salomón apo ikax, ja ani yakátinin yakáti.

¹⁸ Jaskara ikenbira Adonías moa apo ike, jara min onannama iki.

¹⁹ Waka benebo betan rama aniai waka bake benebo, itan icha carnerobora jato retemake, jaskáaxonra min bakebo kenake, jainxonra ja sacerdote Abiatar betan ja sontárobaon koshi Joab kenake, ixonbira ja mia akinni teetai min yonoti Salomón kenayamake.

²⁰ Ramaki, mipekáo tsoa apo ikai ixon min yoitininra jatíbi Israel jonibo manata ikanai.

²¹ Jaskáyamaketianra, mia mawáketian, nokon bake Salomón betanbi ea retekanti iki —akin.

²² Betsabé jaskati apo betan yoyo ikaitianra, profeta Natán nokota iki,

²³ jaskáaxonra jaskara iká apo onanmakana iki. Jatianra ja profeta apo bebonmeax, maikibi bekepinon kaman beota iki,

²⁴ jainxonra yokata iki: —¿Mia iká pekáo Adonías apo itiki min yoia iki?

²⁵ Jaskara ixonra rama ipakexon jato retemake, waka benebo, ramashaman aniai waka bake benebo, jainxon icha carnerobo, ja axonra min bakebo kenake, ja sacerdote Abiatar itan ja sontárobaon koshi capitánboribira kenake. Jainra jabé pii ikanai, xeaira ikanai, jainoax saf ikanai: ‘¡Apo Adonías jabanon!’ ikibo.

²⁶ Ixonbira, ea kenayamake, nin ja sacerdote Sadoc, nin ja Joiadanin bake Benaíasbi, nin ja min bake Salomónbira kenayamake.

²⁷ ¿Ea nato min yonoti yoiamatianbiki mia iká pekáo min yakátinin yakáti tsoa min yoia iká iki? —akinbo.

Davidkan Salomón jawen toan apo iti yoia

²⁸ Jatianra apo Davidkan Betsabé kenati jato yoia iki. Ja apoiba nokotaxa, Betsabé apo bebon chankata iki.

²⁹ Aponra akonkin senenhati ixon yoia iki: —Jan ea jatíbi masá teneainoa xabáaka Ibon janenkora akonkin en yoiai,

³⁰ Israelbaon Ibo Diossen janenkora akonkin senenhati ixon en mia yoiai, ramabira en mia senenhaxonai: Min bake Salomónra, nokon toan ani yakátinin yakatai, jaskatax ea iká pekáo apo ixon jato ikinti iki —akin.

³¹ Betsabéra, apo bebon mainbi bekepinon kaman beota iki, jaskatax koshin neskata iki: —¡Jatíbitian nokon ibo, apo David jabanon! —iki.

³² Japekáora ja sacerdote Sadoc, profeta Natán, Benaías, ja Joiadakan bake kenati apo Davidkan jato yoia iki. Jabo apo bebon joketianra,

³³ jan jato yoia iki: —Nokon joni koshibo betan botankanwe, nokon bake Salomón, nokon mulan peyasaxon Gihónhain botankanwe;

³⁴ ja sacerdote Sadoc itan profeta Natánman, Israelbaon apo iti onantiakin Salomón imaketianra, carnero machan maton xoon ati iki, jainoax mato koshín saf iti iki: ‘¡Apo Salomón jatíbitian jabánon!’ iki.

³⁵ Jaskata pekáo jan amistiaxon koiranxon botankanwe, nokon ani yakátinin, yakábanon, nokon toan apo ixon, jato ikínbanon, Israelbo itan Judábaon joni koshi já itira en yoia iki —akin.

³⁶ Jatianra Joiadanin bake Benaíasen, apo yoia iki: —¡Jaskara ibanon, min Ibo Diossen jaskara imabanon!

³⁷ Ja miiibetan ikátiai keskáribii, Salomón betan Ibo ibanon, mia nokon ibo Davidkan akátiai bebonbires ja apo ixon abanon —akin.

³⁸ Japekáora ja sacerdote Sadoc, profeta Natán, Joiadanin bake, Benaías, cereteobo itan peleteobaon, boxon Davidkan mulan ja Salomón peyásankana iki, jaskáaxonra Gihónhain bokana iki.

³⁹ Jainxonra ja Diossen carpa xobonkonía, westíora machan xenía bixon,

sacerdote Sadocnin apo imakin Salomón machita iki. Ja aká pekáora carnero machan westíforatonin xoon aka iki, jatianra jatíbi jonibo saí ika iki: “¡Apo Salomón jatíbitian jabánon!” iki.

⁴⁰ Jainxonra jatíxonbi chibankana iki, flautabo xoon aabainnira bokana iki. Ja raroí saí ikanaitianra, mai kaxketai keská iká iki.

⁴¹ Adonías itan jatíbi ja kenaabaonra ja saa ikanai ninkáxon pikín jenekana iki. Ja machán xoon ikai ninkatata, Joab iká iki: —¿Jawekopíki jemameax kikinbiresi saa ikanai? —iki.

⁴² Já yoyo ikainbira, ja sacerdote Abiatarnin bake Jonatán nokota iki. Adoníasninra yoia iki: —Jikiwe, miara iresama joni iki, enra onanke, minra jakon joibo noa bexonai —akin.

⁴³ Jatianra Jonatánman Adonías yoia iki: —Jaskarama riki, en mato yoiaira jakon joima iki. Non ibo apo Davidkanra, Salomón moa apo imake,

⁴⁴ ja imanoxonra, ja sacerdote Sadoc, profeta Natán, Joiadakan bake Benafas, cereteobo itan peleteobo yoike, Salomón betan kati, jaskáati yoiara jabaon apon mulan peyásanke.

⁴⁵ Jainxonribira ikon sacerdote Sadoc betan profeta Natánman, Gihónhainxon moa apo imakin onantiakin yoike, jainoax banetira kikin raroshaman bokanke. Jaskatira ja jemameax saa ikanke, ja ikanai riki maton ninkata.

⁴⁶ Jainoaxribira Salomón moa ani yakátinin yakáke,

⁴⁷ jainoax ja apo Davidkan joni koshibora moa rarokinni bokanke, Diosen jatíbinin Salomón jabebonmanon ixon, itan Davidkana bebonbires ani maia iti kenxonkinra yoikanke. Ja apo Davidkanbira jawen oxatiain beoxon Dios rabike,

⁴⁸ jatianra neskáke: ‘Ibo jakon ibanon, Israelbaon Dios, en oinnon ixonra rama westífora nokon bake chiní ani yakátinin yakámake’ —iki.

⁴⁹ Jatianra ja Adoníasnin kenaa jonibo saki ikana iki; jatianra jatikaxbi

wenitax, jaton ikainbiribi moa bokana iki.

⁵⁰ Adoníassibira, Salomónki raketi wenitax Dios rabiti xobonko kaa iki, jain jonéti benai kaxonra, jainxon yoia menotiainoa machán yatana iki.

⁵¹ Jatianra wetsa joni Salomón yoi kaa iki: —Ninkáwe, Adoníasbira miki raketai, jain koiranmeeti benaira kake, onsá jakonmanin anaketian machan yatanax jaki chipotira kake. Miara yokatai ramabi min yoiti, akonkinra en yoiái, enra reteyamai iki mia iti —akin.

⁵² Jatianra Salomónman yoia iki:

—Jakon joni keskati ikaitianra, jawen maponkoníax westífora boobi main pakétima keskáakin, jawe jakonmabi en atima iki; ikaxbi jan jakonma jawéki aká onanti iketianra, mawáti iki —akin.

⁵³ Jatianbira Salomónman ja yoia menotiainoa pikokanon ixon jato raana iki. Jainoax kaaxa, apo Salomón bebon Adonías beota iki, jainoara jawen xobonko katanon ixon yoia iki.

Senentiainni ja atibo Davidkan yoia

2¹ Mo mawáti ochóma ixonra, jaskara atibo Davidkan jawen bake Salomón yoia iki:

² “Nato netemeax jatikaxbi jaskákanai keskátira kaaibi ea kaaí. Koshi shinanwe, koshi joni keskati iwé.

³ Min Ibo Diossen mia ati yoiabo senenhawe, jawen shinan itan jawen esébo senenhawe, ja senenhati esébo, koshi joibo, ja ati yoia joibo, ja Moisésen esekan yoiái keskábo senenhawe, jawerano mia kanonbi, jatíbi jawéki min akábo bebonon ixon.

⁴ Jainxonribi Ibon ea axonti yoini senenhanon ixon, nokon bakebaon jaton ikábo jakonhakin koiranti iki, já bebonra ikon jakon jakanti iki, jatíbi jaton shinaryanixbi, itan jaton kayayanixbira, jakon jakanti iki, jatianra Israelnin ani yakátinin yakati, jawentianbi nokon rarebobo jenétima iki.

⁵Ramara, min kikinakin onanke, ja Sarvianin bake, Joabnin ea jaskara aká, ja israelitabaon sontárobaon koshibo jaskara aká: Nernin bake, Abner betan Jeternin bake, Amasá, jabora jan jato retea iki, moa reteanantima ikenbi, ja reteanantiainoax mawatabaon kopikaa-kinra jato aká iki, jato retexonra ea apo iketian ea iboamaa iki.

⁶Jaskara iketian, jaskáaxon jawéki ati onan ixon, jakonhaxon mawámayamawe.

⁷Ja Galaadhinoa, Barzilaiin bakebo jato jakonhakin noibawe, jábo min piairibi jato pimawe, min wetsa Absalónman ea jabáma kaitianra koiranxon ea akinkana iki.

⁸Simei, ja Gerakan bake, Bahurim-hainoa benjaminita, ja miibetan ikáribi oinwe. Janra Mahanaimhain ea kaai nete, jakonmakinbires ea shinanxona iki. Japekáora, ea jaskáa ikaxbi, Jordán paron-koxon ea bii kaa iki, jatianra Ibo kopíresa en mia reteyamai ixon en yoia iki.

⁹Miara enra shinanxonyamai iki iti yamake. Miara shinanya iki, jáki jaweati iki ixonra min onanke. Ikaxbira basiamakin akonbireskin masá tene-maxon min reteti iki”, akin.

David mawata

(1 Cr. 29.26-30)

¹⁰David mawáketianra, jawen anibo ikainribi, jawen janeya jemanko miinkana iki.

¹¹Kanchis baritiara Hebrónhain apo iká iki, jainoaxa kimisha chonka kimisha baritia Jerusalénhain iká iki. Jatibianixa Chosko chonka baritiara, Israelbaon apo iká iki.

¹²Japekáora Salomón jawen papa Davidkan toan apo iká iki, ja apo ixon jato ikinnara kikin koshi iká iki.

Faraónman bake ainbo betan Salomón wanoa

3¹Salomónra Egipto apo faraón betan rareboanana iki, jawen bake ainbo betanra wanoa iki, jainxonra jain

apo ika xobo, Ibon xobo, itan Jerusalén katemakin chikékanai kaman Davidkan jemanko boá iki.

²Jainshamanxon ati yamakenbira, jonibaon manan bochikixon ikonma diosbo rabiainxon Ibo yoina menoxonkana iki, jatianra jainxon Ibo rabiti xobo akanamapari iká iki.

Salomónman Dios onan

shinan yokata

(2 Cr. 1.1-13)

³Salomónmanra Ibo noia ixon, jawen papa Davidkan aká eséboribi senenhaa iki, janribira ja manan bochikixon yoina itan incienso ininti menoxona iki,

⁴jainshamanxon ati keyá ikax jakon iketianra jainxon yoinabo menoxoni, Gabaónhain kakátiai; jainxonra waranka yoina keyokin menoxona iki.

⁵Westsa yaméra, Gabaónhainxon, namá meran oinmaxon, Ibon, Salomón yoia iki: “Mia keenai ea yokáwe, en mia meninon”, akin.

⁶Jatianra Salomónman yoia iki: “Minra nokon papa, min yonoti David akonbireskin noiba iki, jara jawetianbi mia jenetima shinanya, itan atikeskabiakin jaskara ikábo benxoai iká iki, miibetan ixonra pontéres shinanna iki. Jaskákinra min akonbireskin noibaa iki, jainxonra ea jawen bake, jawen ani yakátinin min yasana iki, ramara jaskara winóke.

⁷Mia, Ibo itan nokon Diossé, nokon papa Davidkan toánra jato ikinti min ea apo imake, bakeranonshokopari ikax ea jawebi tanatamapari ikenbira min ea imake.

⁸Ikaxbira ea, min katota jonibaon koshi iki: Kikinbires icha jonira ikanai, icha ikaxa, topóntikoma iki, jati icha onannoxon topóntira atikoma iki.

⁹Min jonibo en jato ikinnon onan shinan ea meniwe, natora jakon iki itan natora jakonma iki ixon en onannon; jaskara ikenki ¿Tsoa iti iki, jan min jonibo kikínbires icha jato ikinti atipana?” akinra aká iki.

¹⁰Salomónman jaskáakin yokatara, Ibon keenshaman iká iki,

¹¹jatianra yoia iki: “Basi jati, icha jawé-kia iti, min rawíbo mawáti yokáyamakin, koshi ixon jato ikinti jaskáaxon jawéki ati onan shinan min ea yokáketianra,

¹²min yokata en akai: Enra mia meniai onan shinan, itan jaskáaxon jawéki ati onan shinan, tsoabira mia ikámatian jayá ikama iki, itan tsoabira mipekáo jayá itima iki.

¹³Jainxonribira, ja min yokatama ikenbi icha jawéki en mia meniai, itan iresama jakon ninkakataira en mia imai, jaskara ikaxa mia jaai kaman wetsa apo mia keska yamati iki.

¹⁴Jainxon nokon keena keská min akaitian, jainxon ja nokon esébo itan jaskara ati en yoia joibo, min papa Davidkan akátiai keskáakin min senenhaitianra, en mia basi jamati iki”, akin.

¹⁵Jatian oxá jishtenxonra, namáketian ítai Salomónman onanna iki. Jatianra Jerusalénhain jakiribi kaax nokóxon, ja senenhabeonti joi jain iká ani bonanti bebonxon, Ibo yoinabo jatiobi keyokin menoxona iki, itan jabé raeantani kopíribira yoinabo menoxona iki. Japekáora jatíbi jawen joni koshibo aniakin jawékiati jato axona iki.

Salomón joi benxoai onan shinanya

¹⁶Jaskara inontianra rabé tsini ainbo apo oinni kaa iki. Jaiba ixonra,

¹⁷wetsan yoia iki: —¡Jawe iresai-panon, Apó! Nato ainbo betanra noa ja xobonbicho jake, já ebé xobon iketianra ea benbo bake bakenna iki.

¹⁸Ea moa bakena kimisha nete iketianra, nato ainboribi benbo bakena iki. Noa rabébichora jain iká iki. Wetsa jonibora ja xobon yamaa iki.

¹⁹Ikaxbi wetsa yaméra, nato ainbaon bake mawata iki, en shinanara jawen baken perakaa iká iki.

²⁰Jatianra ea oxaa iketian, yamé pochinikon wenixon, ja nokon benbo bake epataxkea boxon, já patax rakana

iki, jaskáaxonra ja jawen benbo bake mawata epatax rakana iki.

²¹Yamékiri wenixon, xoma amanoxon en oinnara iká iki moa mawá. Ikaxbi moa neteketian en oinnara, ja en pikoa benbo bakema iká iki —akin.

²²Ja wetsa ainbaonra yoia iki: —Jaskarama riki, ja jiriara nokon benbo bake iki, ja mawatara mina iki —akin. Ikaxbi ja rekenaton yoia iki: —Jaskarama riki, ja mawára min benbo bake iki, ja jiriara nokon benbo bake iki —akin. Jaskatira apo bebonmeax join ibékona iki.

²³Jatianra apon shinanna iki: “Naton yoiai nokon benbo bakera jiria iki ixon, jatian ja mawára wetsana iki ixon; ¡Ikaxbi wetsan yoiai jaskarama riki!” ixon.

²⁴Jatianra jato yoia iki: —¡Ea espada bexonkanwe! —akin. Jatian moa espada apo boxonkanara,

²⁵jato yoia iki: —Ja jiria bake, rabé kaxke akanwe, jaskáaxon westíora kaxkebo jato menikanwe —akin.

²⁶Ikaxbira ja bake jiriaton tita, ikonbiresi oniskin apo yokata iki: —¡Jaskáayamawe! ¡Min ja jiria bake reteyamawé! ¡Nato ainbo min meniara jakon iti iki! —akin. Ikaxbira wetsan yoia iki: —Nokonama, nin minamabira iti jake. ¡Kaxkebakanon! —akin.

²⁷Jaskáketianra apon jato yoia iki: —Ja jiria bake westíoraxon ja ainbo meniwe. Rete Yamakanwe, jara ikon jawen tita iki —akin.

²⁸Jatíbi Israel jonibaonra, join ikanaitian jakonhakin apon jato joi benxoaxona ninkákana iki, jatianra jaon rakékana iki, atikeskabiakin jato joi benxoaxonti Diossen onan shinan meniara oinkana iki.

Salomónman Tiro apo Hiram betan ja senenhabeonti joi aká

(2 Cr. 2.1-18)

5¹Jawen papa Davidkan toan Salomón apo imakana ninkáxonra, Tiro apo Hiramman, já ointi jawen joni

koshibo raana iki, Hiramra iká iki jatíbitian David betan jakon iká.

² Jatianra Salomónman, Hiram joi bomaa iki:

³ “Minra moa onanke nokon papa Davidkanra, jawen Ibo Dios xoboaxonti atipanyamaa iki, reteananti meranbires ixon, Ibon jawen rawibo jatoaresmai kamanpari.

⁴ Ikaxbi ramara, nokon Ibo Diossen jatíbiain jaskarabo moa itimaakin noa tantimaa iki, non rawibora yamake, jan masá teneti isinboribira yamake.

⁵ Jaskara iketianra, nokon Ibo Dios rabiti xoboaxonti en shinanke, ja nokon papa David yoini keská, jan yoia iki jawerato jawen bakeki jawen toan apo imai, janparires jainxon já rabiti xobo axonti.

⁶ Libanohainoa konxanbo ea xatexonkanon ixon jato yoiwe. Ea tee axonabaonra mia tee axonaibo akinti iki, min yokatatiira min jonibo kopíati en mia meniti iki, minra kikinakin onanke, nonra ja sidoniobaon akai keskáakin jiwi xateti onanyamake”, iki iká.

⁷ Salomónman joi bomaa ninkatata Hiram kikinni raroi saf ika iki: “¡Rama Ibo jakon ibanon, janra David kikin onan shinanya bake menia iki, kikínbires icha israelita jonibora jato ikinti iki!” ikibo.

⁸ Jatianra Hiramman, Salomón joi bomaa iki: “Min joi bemaara en bike, konxanbo itan pino jiwi min ea yokatara, mia axonkin en senenhati iki.

⁹ Ea tee axonaibaonra, LÍbano mananmamea apakexon aniparo kaman bokanti iki, jainoara tapanhaxon, jain boti min yoiainko bokanti iki. Jainxonra ja tapan chorokanti iki. Jainoara ja jiwibo min biti iki. Ja min senenhatin ea keenai riki, jain apo iká xobo meran iká jonibo min jato jawékiati meniti”, iki iká.

¹⁰ Jaskáaxonra Hiramman, Salomón, ja keena keskáakin jatíbi konxán itan pino jiwibo menia iki,

¹¹ jatianra Salomónman, Hiramman jain apo iká xobo meran ikábo jawékiati menia iki: chosko millones chosko pacha waranka litro trigo jainoax chosko waranka chosko pacha litros oliva akana xeni jabiresshaman. Salomónman bari-tiatiibi, Hiram meniara jaskara iká iki.

¹² Jaskáaxonra, ja meniti yoia ixon, Ibon, Salomón jakon ati onan shinan menia iki. Jainxonribira, Hiram betan Salomónman ja senenhati joi abékona iki, jatianra moa jakon ibekona iki.

¹³ Jatianra apo Salomónman jatíbi Israel jonibo teaxon koshi jato teemati, koshi joi pikoia iki. Ja koshi teetiainra kimisha chonka waranka joni jato tsinkia iki,

¹⁴ jabora oxetiibi rawinnanani, jatian kati iketian, ja bokanaitiibi chonka warankabo LÍbanoain jato raankana iki. Jaskáaxa, ja jonibo westíora oxe LÍbanoain ikax, rabé oxe jaton xobonko ikax iki, ikana iki. Ja teetaibo jato koiranaira jawen jane Adoniram iká iki.

¹⁵ Salomónman jonibora jaríba iki, kanchis chonka waranka joni jawéki papiaibo, posaka chonka waranka jonira makan kaxkexon panchaibo mananman ikana iki,

¹⁶ ja kimisha waranka kimisha pacha joni, jaskáakin tee ati jato yoiaboribira jaa iki.

¹⁷ Apo Salomónmanra, Dios rabiti xobo jan koshiati mai meran ati, ani itan kopí makanbo jato bima iki, jakonhakin kaxkepakea makánboribira iká iki.

¹⁸ Salomón betan Hiramman jonibo, ja xoboati onanbo, itan ja Guebalnin jonibaonra, Dios rabiti xoboati jiwibo tanyanxon, makanbo panchaakin kaxkepakekana iki.

Salomónman Dios rabiti xobo jato amaa

(2 Cr. 3.1-4)

6 ¹ Salomónra ja Israelhain apo iká moa jawen chosko baritia itín, Ibo rabiti xobo jato amakin peoa iki, ja

baritia peokoota jawen rabé itin iká Ziv oxen, jatianra israelitabo Egiptonkoniax pikóni, chosko pacha posaka chonka baritia iká iki.

²Ja Ibo rabiti xobo Salomónman jato amaara iká iki, jawen nenké rabé chonka kanchis metroya, jawen naxbá iskon metro, itan jawen keyá chonka kimisha metro wetsa naponbekon.

³Ja Dios rabiti xobo bebonkiri iká chibóra jawen nenké iskon metro iká iki, ja xobon naxbátioribi, jainoax ja chibó tekiara chosko metro wetsa naponbekon ja xobo bechiakiri iká iki.

⁴Salomónman jato amaa xobon ventanabora iká iki, xechaakin kano kekoa-yabo.

⁵Jainxonra ja xobo katei iká chikékibi, jemaori wetsa chitéboribi akana iki, jawen nenkékiriakin itan pekáoriribira akana iki.

⁶Ja chitébora kimisha pekataya iká iki, ja namanmea chitéra rabé metro rabé chonka pichika centímetro, jawen naxbá iká iki; ja mananhokea chitéra rabé metro kanchis chonka centímetro jawen naxbá iká iki; jatian ja bochiki maxkaten iká chitéra, kimisha metro chonka pichika centímetro jawen naxbá iká iki; ja xobo chiké kinianaketianra, jemaorikea irakantibo nenkémabo aká iki.

⁷Ja xoboakinra makan kaxkepaxon panchaakinbo raseneankana iki, ja makánbora jainoa bikanainkoxonbi kaxkexon moa ati keskáakin jankenhakanabo iká iki, jakopíra ja xoboakanainko martillo, yami itan jan teeti akana yami jawékibo tas ikai ninkátima iká iki.

⁸Ja namanmea chitekan xepótira, ja xobo mekayao iká iki, ja mananho iká chitéain kati itan ja maxkaten iká bochikia chitéain mapéti tapitira, nocho poinki keská iká iki.

⁹Ja xoboakin moa keyokinra Salomónman jonibaon, konxán irakan-tibo itan ja tablaninribi mapokana iki.

¹⁰Jaskaaxonra ja teetaibaon xobo katemakin wetsa chiteboribi akana iki, jawen

keyára rabé metro rabé chonka pichika centímetro iká iki, jabora chikékibi konxán kaxkebaon tenwanmakana iki.

¹¹Jatianra Salomón Ibon, yoia iki:

¹²“Ja xobo rama min akaira, en mia yoiai, nokon esébo itan nokon koshi joibo min chibanketian, itan jatíbi ja senenhati en yoia joibaon yoiai keská, jakonhakin min senenhaketianra, mia jaskara imati, min papa David en yoini en senenhati iki;

¹³jatianra israelitabo betan ea jati iki, itan nokon joni Israelbora en jato potatima iki”, akin.

¹⁴Salomón tee axonaibaonra Dios rabiti xobo jankenhakana iki.

¹⁵Ja xobo chichokea chikéra, konxán tablanin rapoa iki. Ja napoorikea jan nabeta chikéra bochikixon namanhakin jiwi tablanin rapoa iki, ja tapora pino jiwi tablanin rapokin nabékana iki.

¹⁶Jainxonribira bochikixon namanhakin, konxán tablabaon chikébo akana iki, jara jawen naxbá, jawen nenké itan keyá iskon metro iká iki, ja xobo chichó senenainra, jain Dios iká Chité iká iki.

¹⁷Dios rabiti chité, xobo meran ikára, jawen nenké chonka posaka metro iká iki.

¹⁸Ja xobo napoori iká chiké pekatena jakiribi konxán tablabaon joa jisáboaxon, itan bimi jisáboaxon nabékana iki. Jatianra jatíbi konxán ikáx, westíora makánbi jishtima iká iki.

¹⁹Salomónmanra xobo meran, jain Dios iti Chité jakonhayona iki, Ibon ja senenhabeonti aká joi jain iká ani bonanti jain anoxon.

²⁰Jain Dios iti Chitekan chichokea xabára jawen nenké, jawen naxbá itan jawen keyá, iskon metro iká iki. Ja bebonra Salomónman, jainxon incienso ininti menoti, konxán jato amaa iki, jara oron rapoa iki.

²¹Jainxonribira ja xobo chichó itan jain Dios iti Chité kikin oronbires rapoa iki, jaskáaxonra oro cadenabo ja bebon aká iki.

²² Jaskáaxonra ja xobo napoori jatí-biain orónbires rapoa iki, jain Dios iká Chité bebon iká, jainxon incienso ininti menotiribira oron rapoa iki.

²³ Jainxonribira jain Dios iká Chité meran iti, rabé ángel querubín keská peiabo, olivo jiwi akana iki. Ja rabébira jawen keyá chosko metro wetsa naponbekon iká iki,

²⁴ jainoax ja rabekan pechira rabé metro chonka pichika centímetrobo iká iki. Jaskara ikaxa ja rabekan pechibo peata, wetsa pechi rebonkonias wetsa rebokaman jawen nenké chosko metro wetsa napónbekonbo iká iki.

²⁵ Ja ángel querubín keská akanara jatio rabébires iká iki; jaskara ikaxa, ja rabébi chosko metro wetsa napónbekon iká iki, itan ja jisá rabébires.

²⁶ Jawen keyáribira, chosko metro wetsa napónbekon iká iki.

²⁷ Jabora Salomónman, jain Dios iká Chité meran jato amaa iki. Jatón pechibora peata iká iki, jabora chikéki okén mepibekona iká iki, ja wetsaorikea jatón pechira jain Dios iká Chité napónbeconshaman mepibekona iká iki.

²⁸ Jainxonra Salomónman ja ángel querubín keskábo oron rapoa iki,

²⁹ jainoax ja ani xobo chichokea chikéainbora jatíbiain ángel querubín jisáakinbo, xebon jisábo itan joa jisábo akana iki.

³⁰ Jainxonribira ja xobon tapo chichó oronbires rapoa iki.

³¹ Jain Dios iká Chitéain jikiti xepótira, olivo jiwi aká iki, jan tewantira xepotiain jiwi bochiki itan oken abékona iki, jainoax ja xepóti witábora jan metsaati pichika paróyabo iká iki.

³² Ja olivo jiwi akana xepoti tabla oken ibékona pekaténra, chaxaxon ángel querubín jisáboakin, jainxon joa jisáboakinribi axon jatíbi jabo oronbires rapokana iki.

³³ Ja xobo naponmea iká chitekan xepóti witábora iká iki, olivo jiwi chosko paroyabo.

³⁴ Ja rabé xepótinin jan xépoti rabé tablabora, pino jiwi akana iki, ja rabébira iká iki yexketai.

³⁵ Jainra ángel querubín jisáboakin chaxakana iki, xebon jisábo, itan joa jisábaon raoakanara iká iki, jaskáaxonra oronbires rapokana iki.

³⁶ Jainxonribira ja chichó xabá iká katemakin chikékana iki, makan kaxkebo panchaakin rasenenhabaonra kimisha joyó pekatakin akana iki, ja mananhora westíora joyó konxán tonronbo akana iki.

³⁷ Ja apo iká chosko baritia itin, Ziv oxe iketianra, Salomónman Ibon xobo akin jan tewanti makanbo mai meran tipinmakin jato peomaa iki;

³⁸ jatian ja apo iká jawen chonka westíora baritia itin, Bul oxe iketian, baritia posaka oxe itínra, xobo jatíbi jaskáakin ati shinanna keskáboakin moa senenhakana iki. Kanchis baritia senenra Salomónman jato ani xoboamaa iki.

Ja senenhabekonti joi jain iká ani bonanti Ibo rabiti xobonko bokana

(2 Cr. 5.2-14)

8¹ Jaskáaxonra, Salomónman Jerusalénhain jato tsinkia iki, Israel joni koshibo, jatíbi ja tsamátiibi iká jonibaon joni koshibo, itan ja israelitabaon rarebobaon joni koshibo, jatíbi jabora já bebon jato tsinkia iki, ja senenhabekonti joi Ibon aká jain iká ani bonanti Jerusalénhainoa, Davidkan jemanko taxkekin bonoxon.

² Ja onantishamanhakin fiesta ati nete, Etanim oxe iketian, baritia jawen kanchis oxe itinra, jatíbi israelitabo apo Salomón betan tsinkita iki.

³ Moa nokóxonra joni koshibo betan, ja ikon sacerdotebaon, ja Diossen senenhabekonti joi jain iká ani bonanti bia iki,

⁴ jainxonra Dios betan nokoananti carpa xobo betanbi jainoa bokana iki, jain iká jatíbi iresama jawékibo, jan

jawékiatiboribira ikon sacerdotebo betan Levitabaon boa iki.

⁵Ja apo Salomón betan jatíbi israelitabo tsinkitabaonra, Diossen senenhabe-konti joi jain iká ani bonanti bebonxon, carnerobo betan waka benebo topontimatibires menokana iki.

⁶Japekáora, ja senenhabe-konti joi jain iká Ibon ani bonanti, sacerdotebaon boá iki, boxonra ani xobo chichó jain Dios iká Chitéain, ja ángel querubínbaon pechibo iká namanbi akana iki,

⁷jabaon pechi peatatonra ja senenhabe-konti joi jain iká ani bonanti, itan jan keona jiwibo mapoa iki.

⁸Ikaxbi ja jiwibo nenkeira iketianra, jain Dios iká Chité bekeiba iká, jainxon Dios rabiti Chitéainxonbi oinna, ja jiwi repikotabo jishtibires iká iki, ikaxbi jemaorixon oinnara jishtima iká iki; jatianra ramakamanbi jaskara baneta iki. Ja ramakamanbi iki ikára nato kirika wishanontian yoi iká iki.

⁹Ja jain esé iká ani bonantiainra, Horeb mananhainxon Moiséssen jain naneni rabé makan tablares iká iki, ja israelitabo Egiptonkonias pikónontian Ibon ja senenhabe-konti joi aká wisháa tablabo.

¹⁰Jainxon Dios rabiti Chitéainoax ikon sacerdotebo pikóketianra, Ibo rabiti xobo meran koin bochoa iki,

¹¹koin bochoketianra, ikon sacerdotetebo jainxon rabii banéti atipanyamakana iki, Ibonra jawen penekan jawen xobo bochoa iki.

**Já rabiti xobo Salomónman
Dios iboamaa
(2 Cr. 6.1-7, 10)**

¹²Jatianra Salomónman yoi iki:
“Tbó, minra yoi iki,
mia yamé meran jaa.

¹³Ikaxbira mia jain jati en jato xobo amake,
jainra jatíbitian mia jati iki”, akin.

¹⁴Jatianra jatíbi israelita jonibo bebon, apo kaa iki, jain charókanketianra, jato jakonhakin shinanxonkin,

¹⁵neskáa iki: “Israel jonibaon Ibo Dios jakon ibanon, ja nokon papa David axonti yoinira moa senenhake, neskáa-kinra yoi iki:

¹⁶Egiptonkonias nokon joni Israelbo en pikoni netenbira, jawerato jemabi, jatíbi Israel jonibo xaranmea, jainxon ea rabiti xoboati en katotama iki. Ikaxbira nokon joni Israelbo apo ixon ikinti David en katota iki’ akin.

¹⁷Jaskatira ja nokon papa David, Israelbaon Ibo Dios rabiti xoboaxontin keena iki.

¹⁸Ibonra yoi iki: ‘Jaskara ikenra min xoboakasai jakon iki;

¹⁹ikaxbi jan atira miama iki, ja min bakeatoninra ati iki. Janra ea xobo axonti iki’, akin.

²⁰Jaskara ixonra, ja ati yoini Ibon moa senenhake. Ja yoini keskataria nokon papa Davidkan toan, Israelbaon ani yakatinin ea yakáke, jainxonra Israelbaon Ibo Dios en jato xoboama-xonke.

²¹Jainxonribira, Egiptonkonias non rekenbo jato pikonontian, Ibon jato betan ja senenhabe-konti joi aká jain iká ani bonanti, jain ati chité xobo meran en jato amaa iki”, akin.

²²Jaskata pekaora jainxon yoina Ibo menoxonti bebon chirankoota iki, jatíbi israelita jonibo bebon, jainoaxa jawen meken naiori sanantaanan,

²³koshín neskata iki: “Tbó, Israelbaon Diossé, mia keska Diossa naikanbi itan mainbi yamake, ja senenhabe-konti joi jato betan akára min senenhai, itan akonkin shinanxon mia yoiti ixonai-bora, min jato kikhakin jakonhai;

²⁴ja nokon papa David, min yonoti, axonti min yoinira, min senenhake, ja min akátoninra min yoini joi rama nete min senenhake.

²⁵Jaskara iken, Israelbaon Ibo Diossé, nokon papa David, min yonoti yoini-ribi senenhawe, jawen chiní bakebo maxkátima, min akinnaton, Israelnin ani yakatinin yakákanti, jawen bakebo

jakon jaketian, itan mii bebonmeax já iní keskati ikanaitian.

²⁶ Jaskara iken, Israelbaon Diossé, ja nokon papa, min yonoti David, axonti min yoini senenhawe.

²⁷ Ikaxbi ¿Ikonmein iti iki, Dios nato main jati? Ja nai kikin ani ikenbira, mia jain iti senenma iki, ¡Jaskara ikaxa nato en mia jato xoboamaxona mia jain iti senenmabobi iki!

²⁸ Jaskara ikenbi, nokon Ibo Diossé, akinnon ixon teakin en mia yokatai ninkáwe; nato min yonoti mia yokákin rama orani koshin saí ikai ninkáwe.

²⁹ Netén itan yamé inonbi nato xobo oinkin jeneyamawe, jainra ea iti iki ixonra min yoia iki. Nato min yonotinin mia yokákin oranai ninkáwe.

³⁰ En mia yokataibo ninkáwe, itan min joni Israelbaon nato min xobonko noko-tiakin oranaitian ninkáwe. Naikanxonbi non akai ninkáwe, jain mia jaainxonbi ninkáwe, itan non jakonmabo noa shinanxonyamawe.

³¹ Tson inonbi jawen kaibo ramia-ketian, nato xobonko iká mia jainxon yoina menoxonti bebonxon ikonrin ixon teaxon keshamakanaitian,

³² naikanxonbi min ninkáwe, itan awé; min yonotibo atikeskabiakin jato joi benxoaxonwe. Jan jakonma aká ramíawe, jawen jakonma akábo kopí masá tenemawe, jatian jakonma akáma joni, jaskarabo atin atikeskabiakin joi benxoaxonwe.

³³ Min joni Israelbo miki ochaketian jaton rawibaon jatoaresa, jakiribi miki banéxon mia rabikanaitian, itan nato Dios rabiti xobooriakin oinxon orankin mia yokákanaitian,

³⁴ naikanxonbi jato ninkáwe, ja ochakana ikenbi jato shinanxonyamawe, jaskáaxon non rekenbo min menini mainko jato banémawe.

³⁵ Ja min jonibo miki ochaketian, oi beyamai yoabo choshiketian, nato nenonxon orankanketian itan min jane rabikanketian, itan jaton ocha kopí min

jato masá tenemaa moa jaton shinan wetsaakanketian,

³⁶ naikanxonbi min jato ninkáwe, min yonoti, min joni Israelbo jaton ocha kopi jato shinanxonyamawe, jaskáaxon jakon iti jato axeawe. Ja jatíbitian iboati mai min jonibo min jato menini mainko oi bemawe.

³⁷ Nato main jawékiatinin iti iketian, jato abotanai isin jaketian, xanan aká banábo choshiaitian, kikin jakonma xoyabo jaketian, chanpobo iamax ikibo jaketian; non jemabo rawíbaon katexon noa akaitian, wetsa rabintibo inonbi noki nokóketian, iamax wetsa kikin jakonma jawéki inonbi noki nokóketian,

³⁸ israelita jonibo wetsabires inonbi, iamax jatíbi min joni Israelbaon, mia yokákin orankanatian ninkáwe, jato rabintibo winotai oinxon itan chexakakin jaton meken sananxon nato xoboori bechixon orankanaitian ninkáwe.

³⁹ Naikanxonbi, ja min jatinkoxonbi jato ninkáwe, jaton jakonmabo shinanxonyamawe; westforabo jaton aká keskábo jato awé, jaskara ikenra ja akáskanaibo itan jaskara jonin shina-naibo minbichores onanke.

⁴⁰ Jatianra non rekenbo min menini main jaai kaman mia rabikanti iki.

⁴¹ Wetsankonia joni inonbi, min jonima ikaxbi, mia Dios iketian onanna kopíres ochó mainmeax joxon,

⁴² nato ani xoboori bechixon oranketian (min jane ani ninkakatai itan koshibo min jato oinmaa ninkakatai yoikanaitian),

⁴³ jain mia jaa naikanxonbi ninkáwe, jaskáaxon jatíbi mia yokákana jato meniwe, jatíbi maibotiibi ikábaon mia onankanon ixon, min joni Israelbaon akai keskáakin mia rabikanon ixon, jainxon nato xobo en jato amainxonra mia onankanon ixon min jane rabikanai.

⁴⁴ Min sontárobo jaton rawibo betan reteanani bokanaitian, jawerano inonbi

min jato raana bokin ja min katota jemaori bechixon, itan ja xobo en mia jato amaxonaori bechixon orankanaitian,

⁴⁵ mia yokákin orankanai naikanxonbi ninkáwe, jaskáaxon jatoreskanon ixon jato akinwe.

⁴⁶ Tsoabira ochayamai yamake, jaskara ikenra israelitabo miki ochakanketian, jatoki kikinini sínáxon, jaton rawikan yanka yonoti ikanon ixon min meniketian, ochó iamax ochóma jaton main jato bokana,

⁴⁷ yatanxon jain jato bokana mainxonbi mia rabikanaitian, itan min akinnon ixon mia yokákanaitian, jainoax ochaxonra non jakonma ake ikax shinanmeetax keshakanketian,

⁴⁸ jaton yanka yonoti iti jaton rawikan mainko jato bokanainkoxonbi, jatíbi jaton shinanyaxonbi itan jatíbi jaton kayayaxonbi, jakiribi mia rabiti shinanxon, jaton rekenbo min jato menini maiori bechixon itan min katota jemaori bechixon jainoax en mia jato amaxona xoboori bechixon mia orankanketian,

⁴⁹ jan miki oranaibo itan akinnon ixon mia yokákanabo jain mia jaa naikanxonbi ninkáwe, jaskáaxon jato akinwe.

⁵⁰ Min jonibo miki ochaabo jato shinanxonyamawe itan jatíbi ja miki yoitimaboribi jato shinanxonyamawe. Jato boabaon noibaxon jakonhakanon ixon jato akinwe.

⁵¹ Min jonibora minabo iki; yami charaati hornon tiritai keskáinoara Egiptonkonía min jato pikoa iki.

⁵² Ea min yonotinin oranaitian kinkinhakin ninkáwe, min joni Israelbaon mia yokata ninkáwe. ¡Diosé, mia non saí aka noa ninkáwe!

⁵³ Ibó, minra jatíbi nato maibotiibi iká jonibo xaranmea minabiribi itibixon nonbiribi iti min noa aká iki, non rekenbo Egiptonkonía min jato pikonontianra ja min yonoti Moisés meranxon min jaskara yoia iki”, iki.

⁵⁴ Jatian ja yoina menoti bebon chirankooxon, Ibon akinnon ixon yokákin meken sananxon orankin senenhax,

⁵⁵ wenitax nixonra, jatíbi israelita jonibo, jakonhakin shinanxoni koshinshaman neskata iki:

⁵⁶ “¡Ibo jakon ibanon, jawen joni Isrealbo moa jakon jamaa kopí, jaskáati yoia ixonra jatíbi ake! Jawen yonoti Moisés meranxon ja axontibo jakonhakin yoia ixonra, jawebi senenhayama yamake.

⁵⁷ Jaskara iketian rama, non Ibo Dios non rekenbo akinni jato betan iní keskaribii nobé ibanon. Nobé iamakinra noa potabaintima iki,

⁵⁸ jaskáribiakinnra en yokatai, yoiti iti noa jan kenmanon ixon, jatíbi jawen shinanbo non senenhanon ixon, koshi joibo, ani esébo, ja senenhati esébo, ja non rekenbo senenhati yoinibo.

⁵⁹ Nato jawékibo en non Ibo Dios yokata, yamé itan neten jatíbitian shinanbanon, ea jawen yonoti betan jawen joni Israelbo ja maxkatainbo atikeskabiakin noa akinoxon,

⁶⁰ jatian jatíbi maibotiibi iká jonibaon anon onankin nato mainmea Iborá Dios iki ixon, jainxon wetsara yamake iki ixon.

⁶¹ Jaskara iken non Ibo Dios betan ikon ikanwe, jainxon jawen esébo, itan ja ati yoia joibo akí yoiti ikanwe, rama nete maton akai keskáakin jatíbitian senenhakanwe”, iki.

⁶² Nato jaskarabo iká pekáora, apon itan jatíbi Israel jonibaon Ibo yoina menoxonkana iki.

⁶³ Jatianra Salomónman, Ibo, rabé chonka rabé waranka waka bene itan pacha rabé chonka waranka carne-robo, jabé raeananti kopí menia iki. Jaskáxonra apon itan jatíbi israelitabaon, Ibo Dios xobo iboamakana iki.

⁶⁴ Ja neteribira Ibon xobo bebon iká chichokea jemaribi iboamaa iki, jainxonra yoinabo keyokin menoxonkana iki,

meskó bimi berobo itan ja raeanankin yoinabo menoa xenira menoxonkana iki, yoina menoti bronce akana jainxon ati senenma iketianra jemanxon akana iki.

⁶⁵ Jaskara inontianra, Salomón itan jatíbi Israel jonibo, jainoax kikin icha joni Hamat jikitiainoax Egipto wean ikainoax beabaonra, Ibo Dios axonkin Peotabaon fiesta aká iki, jainxon wetša fiestaribi akanara kanchis nete iká iki; jatian jatíbi fiesta akanara chonka chosko nete iká iki.

⁶⁶ Ja iibata wetša netenra, Salomónman ja jonibo moa jato raana iki, jatianra jabo apo jakonhakin shinanxonbaini, jawen yonoti David itan jawen jonibo Ibon, jatíbi jato jakonha iketian, raroshaman itan jakon shinanbaini jaton xobonko bokana iki.

**Dios betan Salomónman ja
senenhabekonti joi ati shinanna**
(2 Cr. 7.11-22)

9 ¹Salomónman jawen teetaibo amaa moa Ibon xobo itan apo jain iti xobo akin senenhaketian itan jatíbi ati shinanabo akin senenhaketianra,

² jawen rabé itin, Gabaónhainoax iantana keskati Ibo jaki pikota iki,

³ jainxonra yoia iki: “En ja axonti orankin min yokatara en ninkáke, enra iboai nato xobo, jainxon jatíbitianbires maton ea rabinon ixonra bike. Jatíbitianra en koiranti iki, jainxonra jakonmanaketian en panati iki.

⁴ Ebebonxon min papa, Davidkan, akátiai keskáakin min jakon aketianra, mia jan yointi yama iketian itan pontéres mia iketian, jatíbi ati en yoia min akaitian, nokon esébo itan nokon koshi joibo shinanni mia yoiti iketianra,

⁵ jatíbitian Israelhain min rarebo en apo imati iki, min papa David, jaskara iti en yoini keskáakin, jawen chiní bake westíora jawetianbi maxkáyamai Israelnin ani yakatinin yakátira iká iki,

⁶ Ikaxbi min itan min bakebaon ebetan iamakin, nokon koshi joibo itan

nokon esébo en mato meniabo senenhamakin, wetša diosbores maton jawéki axonai itan maton rabiaitianra,

⁷ en jato menia mainkonía, en jato pikoti iki, ja xobo iboa ixonbira en jeneti iki, itan ja maibotiibi iká joni-bora jatíbitian Israelboki shirokanti iki.

⁸ Ja nato xobo ras akana texeara westíora tsamáres banéti iti iki, jatíbi já patax winotaibora ratéti iki itan shiroti iki, jainoax yokakaati iki, jawekopí nato mai betan nato xobo Ibon jaskáarin iki, iti iki.

⁹ Jatianra yoikanti iki, jaton rekenbo Egiptonkonía jan jato pikoni, jaton Ibo Dios jenekana kopí itan wetša diosbores rabianan jaboires jawéki axonkin jenekashamakanai kopí, jato aká riki ixon; jaskara ikenra Ibon jatoki anibires jakonma jawéki raana iki”, akin.

**Sabáinoá apo ainbo
Salomónhíba merata**
(2 Cr. 9.1-12)

10 ¹ Sabáinoá apo ainboninra, Ibonbi imaa Salomón kikin onan ninkakatai yoikanai ninkata iki, jaskatira ikonrin kikin onan ixon, atikoma jawékibo yokáxon tanai Jerusalénhain kaa iki.

² Jawen kikin joni koshibaonbires kateara nokota iki, jawen camello-bora ininti, kikin icha oro itan metsá kopí makan papíabo iká iki. Jatian Salomónhíba nokóxonra, jatíbi ja yokati shinanabo yokata iki,

³ jatianra Salomónman jatíbi jan yokatabo yoia iki. Jaskara riki ixon, ja yokata yoitira westíorabi jan onan-yamaa yama iká iki.

⁴ Ja apo ainboninra oinna iki ja Salomónman jakon ati onan shinan, itan jain apo iti xoboa,

⁵ jawen mesankonia noe pitibo, jawen joni koshibo jaton jain ikábo, jawen yonotibaon jaton jaskara jisá chopa, jan xeamaibo, itan Dios rabiti xobonko yoinabo menikin keyokin menokanaibo, jaskarabo oinnaxa kikini rateta iki,

⁶jaskákinra apo ainbaon ja apo yoia iki: “Min jawéki akábo, itan ja min jakon ati onan shinan yoikanaibo, nokon mainxon en ninkatara, ikonshaman iki;

⁷neskati joxónpariresa rama en ikon-hati atipanke, nokon beronbira en oinke. Ikon riki, napónbekontanibira ea yoiamakana iki, ja min jakon ati onan shinan, itan min jawékibora ja yoikanai en ninkata bebonbires iki.

⁸¡Min awinbora raroshaman ikanti iki, itan ja min yonotibora raroshaman ixon jakon shinankanti iki, jatíbitian miibetanbi ixonra, onanshamanax mia yoyo ikai joi ninkákanti iki!

⁹¡Jakon ibanon min Ibo Dios, mia jawen keenshaman oinxonra, Israelhain mia apo imaa iki! ¡Israel jatíbitian noia ixonra, ponté itan atikeskabiakin jakon-hakin Ibon jato ikinnon ixon mia apo imaa iki”, akin aká iki!

¹⁰Jaskaa pekáora apo ainbonin, kimisha waranka iskon pacha sokota chonka kilo oro apo menia iki, jainxon kikin icha inintibo, itan metsá kopí makánbora menia iki, ja Sabáino a apo ainbonin Salomón ininti meniati ichara jawetianbi Israelhain ininti nokoisma iki.

¹¹Jaskáakenbira, Hiramhinoa wapónronin Ofirhainoa oro bea iki, icha sándalo jiwi itan metsá kopí makánboribira bea iki.

¹²Ja Sándalo jiwibaonra, apo Salomónman, Ibon xobo itan jain já iká xobo katemakin xechaakin jato chikéaketamaa iki, ja bewati onanbora arpabo itan salteriobo jato axona iki. Jawetianbi, itan rama kamanbira jatí icha sándalo jiwibo nokotai oinkanama iki.

¹³Apo Salomónmanra, kopikin ja Sabáino a apo ainbonin jatíbi ja keenkin yokata jawékibo menia iki, moa jawen shinanmanbi meniabo jakebira tekikin meniribia iki. Jaskaa pekáora ja apo ainbo, jan akinnai jonibo betan moa jawen main kaa iki.

Onan shinanya itan icha jawekia Salomón ninkakaata

(2 Cr. 9.13-24)

¹⁴Salomónman baritiatíbi oro biaira rabé chonka rabé waranka kilo iká iki,

¹⁵jaskáaxonbira ja jawékinin maroai-baon kopía, itan jawéki marokin boai-baon kopíabo jainoax jatíbi Arabiainoa apobaon kopiabo itan ja mainmea koshibaon kopíakin menikana biabo toponkanama iká iki.

¹⁶Salomónmanra oro chaka, rabé pacha jan panáti ati jato yoia iki, westíorabora sokota kilo oro iká iki.

¹⁷Jainxonra kimisha pacha maxko yami panatiribi ati jato yoia iki, westíorabora westíora kilo wetsa napónbekon bebonchaashoko oro iká iki, jabora “Líbano nii”, akin janekana jain apo iká xobonko akana iki.

¹⁸Jainxonribira marfil ani yakati axonkanon ixon jato yoia iki, jaskáaxonra kikin oronbires rapoti jato yoia iki.

¹⁹Ja ani yakátia in mapéti tapitira sokota keyanya iká iki; jan kakepitira metsáakin raa toró, itan ponyan oken ibékona iká iki, jainra león jisáakin akana rabé, ja patax oken nibékona iká iki.

²⁰Chonka rabé leónra jain jaríbaa iki, jabora ja tapiti sokota keyánbotiibi oken nibékonabo iká iki. ¡Jawetianbira wetsa apobaon jaskara jisáakin yakáti akáma iká iki!

²¹Jainoax ja apon copabo jatíbi orobires iká iki, ja apo jain iká xobora “Líbano nii”, akanainko iká iki, jan jawékiatibora jaskáribi iká iki. Jainra jawe koríkibi yamaa iki, ja Salomón janontianra, plata kopíma iká iki,

²²ja apon waporobo Tarsissainxon akanabora, ja Hiramman waporobo betanbi kimisha baritia pekáobo westíorai nokotai iká iki, orobo, platabo, marfilbo, shinobo itan kopí koro-korobora bea iki, jatíbi jabora apo jain iká xobo jan metsaati iká iki.

²³ Apo Salomónra nato netemea jatíbi apobo xewinna kikinbires icha jawékia itan kikinbires jaskáaxon jakon ati onan shinanya iká iki.

²⁴ Ja Diossen menia onan shinanra jatíbiainxon oinkaskana iki itan ninká-kaskana iki,

²⁵ jaskákinra baritiatíbi wetsa apo-baon jatíxonbi kopímabi ja meniti jawékibo boxonkana iki: Plata aká jawékibo, oro aká jawékibo, taribo, jan reteananti jawékibo, ininti jenebo, kabayobo, mulabo boxonkana iki.

Carrobo itan kabayobo marokin Salomónman bia

(2 Cr. 1.14-17; 9.25-28)

²⁶ Salomónmanra janmeax reteananti carrobo itan kabayobo tsinkia iki. Waranka chosko pacha carroya itan chonka rabé waranka kabáyonin niti onan joniboyara iká iki, jabora jan reteananti carrobo jain iká sontárobaon xobonkobo ikana iki, jainoax jatíribibora Jerusalénhain apo koiranaibo ikana iki.

²⁷ Ja apon Jerusalénhain plata kaiara, makan keska icha iká iki; jainoax ja mai teshanpainoa nii meranoa higuera jiwibo ikai keskáakinra konxanbo kaia iki.

²⁸ Salomónman kabayobora Muzri mainmea, itan Cilicia mainmea bekana iki, ja apo jawéki maroxonaibaonra jainoabo bia iki.

²⁹ Ja Egiptonkonía bea carron kopíra iká iki sokota pacha koríki, jainoax westíora kabayora pacha pichika chonka kopía iká iki. Jatianra jatíbi hitita apobaon, itan sirio apobaon ja Salomón maroxonai joniboibakea marokana iki.

Jeroboam Salomónki yoitimaa

11 ²⁶ Icha baritia winota pekáora, wetsa nete, Nabatnin bake Jeroboam apo Salomónki ramiti yoitimaa iki. Ja Jeroboamra, jawen

joni koshi iká iki, Sereda jemamea Efraínman joni. Jawen titara iká iki benomaata ainbo, Serúa janeya.

²⁷ Jaskarainoax Jeroboam apoki ramiti yoitimatara neskara iká iki: Salomónra, jawen papa Davidkan jema katemai iká chiké bebonmea mai xankenbo jato bochoamai iká iki.

²⁸ Jatian Jeroboamra iká iki koshi itan jato ikinti atipana joni, Salomónman oinna ja bake ranon rayá iketianra, Josekan chiní bakebaon tee anon ixon yoiai, koshi jikimaa iki.

²⁹ Jaskarabo inontianra, wetsa nete Jerusalénhainoax pikotax bain kakin Jeroboamman profeta Ahías nokoa iki, Siló jemamea joni perakooti bená saweya kaaitian. Jato rabébicho iká iki ja tsoa yama xabá ikáinko,

³⁰ jatianra Ahíassen ja perakooti benáshaman sawea jopexon, chonka rabé pakex itiakin noshia iki,

³¹ jaskáaxonra Jeroboam yoia iki: “Mina iti chonka pakex biwé, Israelnin Ibo Diossenra mia yoiai: ‘Jaskara kopíra Salomón apo pikoxon, chonka tsamá ja jonibobires tsinkita jonibora en mia meniai.

³² Salomónra westíora tsamá joniares en imai, ja nokon yonoti David eki yoiti iká kopí, itan Jerusalén jema kopires, jatíbi Israel jonibaon jemabo xaranmeara ja jema en katota iki.

³³ Salomónmanra moa ea omiske, jaskáaxonra sidoniobaon dios ainbo Astarté rabiai; ja moabitabaon dios, Quemós; ja amonitabaon dios Milcom rabiai. En oinnara jan akábo jakonma iká iki, jawen papa Davidkan aká keskáakinra nokon esébo, itan ja nokon koshi joibo senenhayamaa iki.

³⁴ Jaskara ikenbira, en apo imapariai, mawatai kaman apo ixon jato ikíntira en imai, ja en katota nokon yonoti Davidkan ja senenhati nokon joibo itan nokon esébo senenhaa iketianres.

³⁵ Ikaxbi jawen bakera apo ikenbi en moa pikoai, jaskáaxonra en mia apo

imai, ja jonibobires tsinkita chonka tsamá jonibora en mia meniai.

³⁶Jawen bakera westfóra tsamá jonibores en jenexonti iki, nokon yonoti Davidkan chiní bake, Jerusalénhain jatíbitian ebebon apo iki jenéyamanon ixon, ja jemara jain ea jati en katota iki.

³⁷Enra mia biti iki, apo ixon jatíbi mia keenai maibo min binon ixon, itan Israelbaon apora mia iti iki.

³⁸Jatíbi ja ati en mia yoia akí mia yoiti ikaitian, itan min akábo ebebon ponté jakon iketian, nokon esébo itan ja senenhati nokon koshi joibo, nokon yonoti Davidkan aní keskáakin min senenhaitianra, en mia akinti iki, jatianra mato rarebobires koshi ikí jenétima iki, David betan aní keskára en ati iki, jatianra Israel en mia meniti iki.

³⁹Davidkan chiní bakebaonra masá teneti iki, ikaxbira jatíbitian itima iki' ", akin aká iki.

⁴⁰Jaskáakin profeta Ahíasnin yoiiketianra Salomónman, Jeroboam retekasa iki; ikaxbira Jeroboam, Egiptonko jabati kaa iki, jainra Sisac apo iká iki, Salomón mawatai kamanra jain iká iki.

Salomón mawata

(2 Cr. 9.29-31)

⁴¹Salomón jaskara iká yoia jatíribi joibo, itan jawen jakon ati onan shinanbo, jainoax jatíbi jan akábora, Salomónman kirikainbo wishaa iki.

⁴²Salomónmanra apo ixon Jerusalénhainxon jatíbi Israel jonibo chosko chonka baritia senen jato ikinna iki,

⁴³mawáketianra jawen papa Davidkan jeman miinkana iki. Japekaora jawen toan, jawen bake Roboam apo iká iki.

Jatonbiribi apo ikana

(2 Cr. 10.1—11.4)

12¹Roboamra Siquimhain kaa iki, jainra jatíbi Israel joni koshibo já apo imai moa bokana iká iki.

²Jatianra Nabatnin bake Jeroboamman, Egiptonkopari ixon ninkata iki,

ja iká iki Salomónki raketi jabati kaax jain jaai baneta.

³Jeroboam kenamakana joketianra, já betan jatíbi ja chonka tsamánoa Israel joni koshibo, Roboam betan yoyo iki bokana iki, jatianra westfóran yoia iki:

⁴—Min papara nobé kikin jakonma iká iki; rama akonbireskin noa teemai, itan apo ixon kikinbiresakin noa kopíamai, jaskarainoa noa tantimawe jatianra mia non teexonti iki —akin.

⁵Jatianra Roboamman jato yoia iki: —Moa botankanwe, kimisha nete itin ebé yoyo iki beríbatankanwe —akin. Jatianra jonibo moa bokana iki,

⁶jatianra apo Roboamman jawen papa Salomón janontian jan akinkatitai joni koshibo betan onannox yoyo ika iki. Neskáakinra jato yokata iki: —¿Nato jonibo en yoinon ixonki, jawekeskáakin maton ea esei? —akin.

⁷Westfóratoninra yoia iki: —Rama nato jonibo akintiaín jikixon, jakon join min jato akára, jatíbitian raroshamankin mia teexonkanti iki —akin.

⁸Ikaxbira joni koshibaon esé ninkáyamaxon Roboamman, jabé senen ania jawen yonoti bake ranonbo betan onannox yoyo ika iki,

⁹neskáakinra jato yokata iki: —¿Nokon papan bebonhira jato teema iketian itan bebonhira kopíati jato yoia iketian, namantani en jato ati ea yokákana jaskáakin nato jonibo yoinon ixonki, jawekeskáakin maton ea esei? —akin.

¹⁰Ja westfóratoninra yoia iki: —Min papan bebonhira jato teema iketian, itan bebonhira kopíati jato yoia iketian, teeiratima itan namantani jato min kopíamati mia yokata jonibora, min jato yoiti iki: 'Nokon papa jakonma iká iketianra, ea bebonbires jakonma iti iki;

¹¹jan mato bebonhira teemaxon bebonhiraribi mato kopíamaa iketianra, en bebonbires mato ati iki; mato cinto-rabaon rishkia iketianra, yami kensho rerontameya rishkítibaon en mato

rishkiti iki', akin jato awé —akin akana iki.

¹²Kimisha nete itinra Jeroboam betan jatfibi joni koshibo jakiribi Roboamhiba bokana iki, jatian kati ja apon jato yoiara iká iki.

¹³Jatianra apon koshi join jato aká iki, ja joni koshibaon esea keskára ayamaa iki,

¹⁴ikaxbira ja bakeranonbaon esea keskáribi jato yoia iki: min papanra jato bebonhira teemaa iki, itan bebonhira jato kopíamaa iki, jan bebonbires jakonma jato aká iketianra, jawen papan cintorabaon jato rishkia iketian, risbí yami kensho rerontameya rishkítibaon jan jato rishkitira iká iki.

¹⁵Aponra joni koshibaon esea ninkáyamaa iki, Ibonra jaskara iti moa yoia iká iki, Nabatnin bake Jeroboam jaskara iti yoia senenti kopíra iká iki, Silóainoa profeta Ahías meranxon jaskara iti yoiara iká iki.

¹⁶Jatfibi Israel joni koshibaon onanna apon jato ninkáxonyama iketianra, westíoran yoia iki:

“¡Nato Davidkan chiní bake non apon itinra noa keenyamai!

¡Non rekenbaon jawékibo nona jatfíbitian itira nato Isaíkan chiní bake betan non biamai!

¡Israelitabó non xobon moa bononbokanwe!

¡Abánon Davidkan chiní baken jawen rarebobiribi koirankin!” akin.

Jatianbira, israelitabo moa jaton xobonko bokana iki.

¹⁷Ikaxbi Judá jemabaon jaa israelitabora, Roboamman apo ixon jato ikinboresa iki.

¹⁸Jato tee senenhamaiton koshi iketian Adoram Roboamman raanketianra jatfibi Israel jonibaon makaman tsakaxon retekana iki. Jatianra apo Roboam ishtonbires jawen carron nanetax, Jerusalénhain jabati kaa iki.

¹⁹Jaskatax ja nete kamanbi, Davidkan rarebo koshiboki, Israel jonibo ramiti yoitimai peokookana iki.

²⁰Israelitabaonra Jeroboam jakiribi joá ninkákana iki, jonibo bebon jonon ixonra kenamakana iki, joketianra jatfibi Israel jonibaon apo imaa iki, tsonbira Davidkan rarebo koshibo ikonhaxon chibankin akonkin senenhamakana iki, Judá jonibobichoresa jato betan ikashamaa iki.

²¹Jerusalénhain nokóxonra Roboamman, jatfibi Judá joniboainoa itan Benjamín joniboainoa, katóxon pacha posaka chonka waranka sontáro tsinkia iki, ja Israel jonibo betan reteananax jakiribi jaton apo inoxon.

²²Ikaxbi ja Diossen joni Semaíassa, já betan yoyo ixon, Diossen neskaakin yoia iki:

²³“Yoiwe ja Roboam, Salomónman bake Judáino apon, jatfibi Judakan rarebo itan Benjamínman rarebo jainoax jatfibi jonibo,

²⁴enra yoiái jaton wetsa israelitabo betan reteanankantima. Moa jatikaxbi jaton xobon botankanon. Jaskara ati shinanax ea keena riki”, akin. Ibon jato jaskáakin yoia ninkata pekáora, moa bokana iki, ja Ibon jato jaskáti yoia keskati.

Ikonma dios israelitabaon rabiti Jeroboamman aká

²⁵Jeroboammanra Siquem jema koshishaman itiakin jato amaa iki, jara Efraín mananman iká iki, jatianra jain jaa iki. Penuel jemaribira koshishaman itiakin jato amaa iki.

²⁶Ikaxbira shinanna iki: “Davidkan rarebo apo ixonra, jakiribi já betan ikámabo jato biribati atipanke,

²⁷nato jonibo Jerusalénhain Ibo rabiti xobónko yoina menoxoni kaketianra jato biti iki. Roboam, Judá apoki axexonra jakiribi moa noibakanti iki, jaskáaxonra ea retekanti iki, jatianra Judáino apon Roboam betan jakiribi ikanti iki”, ixon.

²⁸Jaskara atiki jawekeska iti iki ixon joni koshibo yokata pekáora, apon rabé

waka bake bene jisáakin oro jato amaa iki, jainxonra jonibo yoia iki: “Mato israelitabora ichai moa Jerusalénhain kake. Nenora Egiptonkonía jan mato pikoni maton diosbo iki”, akin.

²⁹ Jatianra ja diosbo, westíora Betelhain jato amaxon, wetsa Danhin jato amaa iki.

³⁰ Jaskatax Israelbo jan ochatira iká iki, jatianra Betelhain itan Danhain ja rabii jonibo bokátikanai.

³¹ Manan keyainbora ikonma diosbo rabiti maxko xoboribi jato amaa iki, jainxonra Levita jonima ikenbi, wetsabiresbo ikonma sacerdote iti jato janea iki.

³² Jainxonribira posaka oxe itin ja chonka pichika nete iketian, jatonbi aká diosbo shinankin ati fiesta jato akinna iki, ja Judainxon akátikanai fiesta keskáshamanribi, jatianra janbi jainxon atinko perakaxon yoina menikin menoxona iki. Ja Betelhainxonra aká iki, ja rabiti waka bake bene jisáakin jato amaabo, yoina menoxonkin, jainxonra ja ikonma dios rabiti jato amaa maxko xobobo akáinko itibo, ikonma sacerdotebo janea iki.

³³ Jaskáakinra, posaka oxe itin jawen chonka pichika nete iketian Jeroboamman Betelhainxon, jainxon yoina menoti jato amaaixon perakaxon yoina menikin menoxona iki. Ja oxera iká iki, jawen keena keskáakin ati fiesta pikoa, israelitabaon jatian dios shinankin ati fiesta riki ixonra onantiakin jato yoia iki, ja oxeribira jainxon yoina menotiaín mapéxon incienso ininti menoa iki.

Acab Israelhain apo iká

16 ²⁹ Kimisha chonka posaka baritia, Asá moa Judáin apo iká iketianra, Omríman bake Acab, Israelhain apo iki peokoota iki. Samaria jemanxonra, rabé chonka rabé baritia apo ixon jato ikinna iki.

³⁰ Ikaxbira jawen ikábo Ibon keenma iká iki, jakopíra ja apo ikamatian wetsa

apobo ikátiai bebon jakonmabires iká iki,

³¹ ja Nabatnin bake Jeroboamman akátiai ochaboribi akíbira jawemabi iká iki. Jabicho ipanankan ja Sidónhinoa apo Et-baalnin bake ainbo Jezabel betan wanoxon bebonbires jakonma iká iki, jainxonra moa dios Baal rabia iki,

³² itan Samariainra, westíora ani xobo dios Baal rabiti jato amaxon, ja meranxon yoina menoti jato amaa iki.

³³ Jainxonribira ainbo dios Asera jisáakin axon, jato nichinmaxon, ja Israelbaon Ibo Dios sinámaa iki, japari iká apobaon imakatitai bebonbires.

³⁴ Acab apo inontianra, Betelhainoa Hiel janeya jonin Jericó benaakin jemaariba iki. Jaskákinra jan xobo koshiati akaitian jawen reken bake Abiram mawata iki, xepóti nichini itaitianra jawen chiní bake Segub mawata iki, ja Nunman bake Josué meranxon Ibon jaskara iti yoini keskára iká iki.

Profeta Elíasnin banábo choshiti yoia

17 ¹ Ja netebaonra Galaad main iká, Tisbe jemamea Profeta Elíasnin, Acab neskáakin yoia iki: “¡Ja en tee axonai Israelbaon Ibon janenkora, en mia ikon yoiai, nato baritiabaonra oi beyamai itan nibibi manyamai, ja en beti yoiai kaman!” akin.

² Japekáora Ibon Elías yoia iki:

³ “Nenoax kaax bari pikotaiori, Querit weain jonétanwe, jara Jordánhinoax bari pikotaiori iki.

⁴ Jainoara wean onpax min xeati iki, mia piti boxonon ixonra wiso nawa-shianbo en moa yoia iki”, akin.

⁵ Ibon jaskara ati yoiara Elíasnin aká iki, jatianra kaax Querit wean kexá jaai baneta iki.

⁶ Jatianra wiso nawashianbaon yamé-kiribo itan yantánbo pan betan nami boxona iki. Jatianra ja weanmamea onpax xeakatitai.

⁷ Ikaxbira jaweti nete pekáo moa wean tsosinna iki, ja main oi beyamai kopí.

**Elías betan Sareptainoa
benomaya ainbo iká**

⁸ Jatian ja wean tsosina moa westíora nete winota pekáora, Ibon Elías yoia iki:

⁹ “Wenitax Sidón jema ochóma iká Sarepta jemanko katanwe, jain jaaira mia baneti iki. Jain jaa benomaya ainbora jan mia pimati enbi moa yoia iki”, akin.

¹⁰ Jaskáara Elías Sareptain kaa iki. Ja jeman jikitian nokoxon oinnara, westíora ainbo karo bii iita iki. Ja ainbora kenaxon yoia iki: —Ea westíora vason ichátama onpax, en xeanon ea bexontanwe —akin.

¹¹ Ja ainbaon moa onpax bii kainbira, Elíasnin kenaxon yoia iki: —Westíora pan pakexibi ea bexontanwe —akin.

¹² Jatianra ja ainbaon yoia iki: —Min Ibon janenkora en mia ikon yoiai, eara jawe panhonmabi iki. Nokon chomonra westíora mesó harinashokores iki, jainoax jarranra ichatamashoko xeni iki, rama jashoko nokon baken jawékiati itan en ati xoi kanoxon karo jawetishoko biira ea iitai. Jara non piti iki, ja aká pekáora moa noa pitin reteai —akin.

¹³ Jaskáketianra Elíasnin yoia iki: —Rakéyamawe matora mawayamai. Ja min yoia xoitanwe. Ikaxbi ja min harina maxko panshoko axon eapari bexontanwe, jaskáa pekáo minna itan min bakena atanwe.

¹⁴ Israelbaon Ibonra yoike, ja chomon iká harina itan ja jarran iká xeni keyóyamai, Ibon nato main oi bema nete kaman —akin.

¹⁵ Kaxonra ja benomaya ainbaon, Elíasnin ati yoia keská aká iki. Jatianra ja ainbo itan jawen bake jainoax Elías, icha nete ja jawékiatia iká iki.

¹⁶ Ja Elías meranxon Ibon yoia keskára iká iki, chomomea harina itan ja jarramea xenira keyóyamaa iki.

¹⁷ Moa jawetio basi pekáora, ja benomaya ainbaon benbo bake isina iki,

jawen isinra kikínbires jakonma iká iki, iikaxonra moa joinyamabobia iki.

¹⁸ Jatianra benomaya ainbaon Elías yoia iki: —Ibon joní, ¿Jaweaki ea jakonma imai mia neno joarin? ¿En ocha aká ea shinanmaxon, nokon benbo bake mawámaxon, ea masá tenemai mia joárin? —akin.

¹⁹ Jatianra Elíasnin yoia iki: —Min bake ea neri bexonwe —akin. Jatian ja benomaya ainbaon, jawen sayánbi noxtia iketian bixonra, jain iká bochiki xobo chité meran boxon rakana iki.

²⁰ Jatianra Ibo akí neskati koshín saí ika iki: “Nokon Ibo itan nokon Diossé, ¿Nato benomaya ainbo ea jawen xobon ikenbiki, jawen benbo bake mawámaxon, min chexakamati iki?” iki.

²¹ Jaskátaanra ja baken kimishai perakaa iki, jaskáxonra Ibo koshín saí aka iki: “Nokon Ibo itan nokon Diossé, ¿Enra mia yokatai nato bake jiriawe!” akin.

²² Ja Elíasnin yokatabora, Ibon ninkáxona iki, jaskáxonra ja bake jirixona iki.

²³ Jatianbira Elíasnin ja bake bitaanan, ja iká bochikia xobo chitéainxon naman boa iki, jatianra jawen tita menikin yoia iki: —¿Oinwe, min bakera moa jirike! —akin.

²⁴ Jatianra ainbaon yoia iki: —Ramara en onanke, miara ikon Ibon joni iki, jaskara ikaxa min yoiabo ikon Ibona iki —akin.

Elías jakiribi Acabhiba kaa

18 ¹ Kimisha baritia pekáora, Ibon Elías yoia iki: “Acabhiba kaxon yoitanwe, moara nato main en oi bemaí”, akin.

² Jaskáara Elías Acabhiba kaai pikota iki. Jatianra Samariain ikonbiresi jawékiatin ikanai iká iki.

³ Elías joai kamanra, Acabnin jan jawéki koiranxonai joni koshi Abdías kenaa iki, jara akonkin Ibo rabiai iká iki.

⁴Jaskákinra Jezabelnin Ibon profetabo reteti jato yoiketian, jan jato westíora pacha bia iki, jaskáa pekáora rabé tsamá pichika chonkabo axon, rabé shanka kini meran jato jonea iki, jaskáxonra jainoa ja jawékiati maxkákanabo jato menia iki.

⁵Jaiba nokóketianra Acabnin, Abdías yoia iki: —Kanonkawé, nato mainra jatíbiain noa kati jake, jatíbi chichokeax jene jokonainkobo itan paronkobora noa kati iki, pastoki non jain nokotima iki ixonra non benati iki, jatianra kabayobo betan mulabo jan jati iki. Non jaskáyamaabira, noa yoinaoma banéti iki —akin.

⁶Jaskáaxonra, jain katibo moa onantiakana iki, jatian moa Acab okea bain kaaitianra; Abdías wetsaorikea bain kaa iki.

⁷Abdías bain kaaitianra, Elíasninbishaman bechia iki, já onanax ja bebon maikibi beotaananra koshin yoia iki: —¡Miarin nokon ibo Elías! —akin.

⁸Jatianra Elíasnin aká iki: —Jenjén, ea riki —akin. Jainxonra yoia iki: —Min ibo yoitanwe, ea moa neno nokota —akin.

⁹Jaskáara Abdíasen yoia iki: —¡En ja yoiara ea reteti iki, enra jawe jakonma akáma iki!

¹⁰Min Ibo Diosen janenkora en mia ikon yoiái, nokon ibon jain mia benati jato raanyamara mai betan jain apo iká mai yamake; jatianra ja benai botanabaon banéxon yoikana iki ikon mia yamaa.

¹¹¡Jatian rama min ea yoiái, kaxon ja nokon ibo moa mia neno nokota en yoiiti!

¹²Neskarara winóti iki, ea miibakeax paskéketianra, Ibon shinanman en onanyamaingo mia boti iki. Jatianra kaxon ja Acab en yoia joxonbi mia nokoyaxon ea reteti iki. Nato ea min yonotira bakera-nontianbi, jatíbitian ea Ibon jakonha iki.

¹³En akára mia yoikanamabira iki, ja Jezabelnin Ibon profetabo jato

retemanontianra, westíora pacha en jato jonémaa iki, pichika chonkabo rabé tsamá axonra, rabé shanka kininko en jato imaa iki, jatianra ja jawékiati maxkákana en jato menia iki.

¹⁴Rama mia neno nokota nokon ibo en yoií kaketianra. ¡Ea reteti iki! —akin.

¹⁵Jatianra Elíasnin yoia iki: —Ja en tee axonai, jatíbi atipana Ibon janenkora en ikon yoiái, ramabira Acab bebon ea iki kaai —akin.

¹⁶Abdíassa, Acab benai kaa iki, Elías joaitian yoií, jatianra já joai bechii Acab kaa iki.

¹⁷Jatianra nokoxon yoia iki: —¿Jaskara ikaxki mia iki, jan jato benómaxon Israel jonibo jakonma imai? —akin.

¹⁸Jaskáketianra Elíasnin yoia iki: —Eama riki jan jato benómai, mia itan min jonibokaya riki jan jato benómai, jainoax Ibon esébo maton jenea kopí itan ja rabiti Baal jisaakin akanabo maton rabiai kopí riki.

¹⁹Rama joi boai jonibo ranwe, israelitabo itan ja chosko pacha pichika chonka, Baalnin ikonma profetabo betan chosko pacha Aseránin ikonma profetabo, ja Jezabelnin jato jawékiamaibo, Carmelo mananman jato tsinkínon ixon —akin aká iki.

Elías itan ikonma dios

Baalnin profetabo iká

²⁰Acabninra israelitabo jato kenama iki, jaskáaxonra ikonma profetabo Carmelo mananman jato tsinkia iki.

²¹Jatianra ja jonibo patax kaxon, Elíasnin jato yoia iki: —¿Jawetian kamanki, rabé shinan akí mato jenetai, ikon Dios rabixon itan ikonma Baal dios rabii mato jenetai? Ibo Dios ikon Dios iketian, já ikonhakanwe, ikaxbi dios Baalkaya ikon iketian, já ikonhakanwe —akin. Jato jaskáara jonibaon jawe joibi yoiamaa iki.

²²Jatianra Elíasnin jato yoiboresa iki: —Eabicho riki, ja Ibon profeta jiria

baneta, ikaxbi dios Baalnin ikonma profetabora, chosko pacha pichika chonka iki.

²³ Jaskara iketian rama, rabé waka bake bene noa menibakanon, jatian maton westíora katókanwe, kaxkepaxon jainxon yoina menotiain karo iká pekatan tsamankanwe, ikaxbira ja karo keteakantima iki. Enribira, wetsa waka bake bene jaskáashokoti iki, jaskáxonra jainxon yoina menotiain karo iká pekatén en tsamanti iki, ikaxbira enribi ketéatima iki.

²⁴ Jaskáaxonra maton diosbo maton yokáti iki, jatianra enribi nokon Ibo yokáti iki, ¡Jatian jawerato diossenki, non yokata noa axonkin chii raanai, jara ikon Dios iki! —akin jato aká iki. Jato jaskaara: —¡Jara jakon shinan iki! —iki ikana iki.

²⁵ Jatianra Elíasnin, Baalnin ikonma profetabo yoia iki: —Matora icha iki, jaskara ixon matonpari westíora waka bake bene katókanwe, jaskáxon moa menotires itiakin akanwe. Jaskáaxon maton dios yokakanwe, ikaxbi chii ketéayamakanwe —akin.

²⁶ Jatianra waka bake bene bixon, moa menotires itiakin akana iki, jaskáaxonra yamékiri peoxon bariapan kaman, dios Baal yokákana iki, Neskáakin: “¡Non mia yokata noa axonwe Baal!” akin. Jainxon yoina menoti akana mayaira choronkana iki, ikaxbira jato akí ikai jawe joibi ninkáyamakana iki.

²⁷ Ja moa bariapan iketianra, Elías jatoki shiroi, neskata iki: —Ja dios iketian, bebonbires koshin saí ikanwe. Jawe jawéki akíra iti iki, iamax poiira ibirai, iamax ochó kaara ibirai. ¡Oxaara ibirai, jishtënhakanwe! —iki.

²⁸ Jabora saí iki jenéyamakana iki, chichikabaon itan kenshobaonra xatékana iki, jaskati axeabo ikaxa jimín nashinon kaman jaskákana iki.

²⁹ Jabora moa bariapan winókenbi, shinan ramitabo ikai keskati sai iananbi choroni jenéyamakana iki, yantan ja

ikon sacerdote israelitabaon yoina jatian menokatitai kamanra ikana iki, jaskákanaibira jawebi iamaa iki, ikaxbira ¡Tsonbi jato kewinyamaa iki, itan tsonbira jato ninkáyamaa iki!

³⁰ Jatianra Elíasnin jatíbi jonibo yoia iki: —Epatax bekanwe —akin. Jaskáara jatíbi jonibo já patax bekana iki, jatianra janbiribi ja Ibo jainxon yoina menoxonti ras ika iketian, benxoa iki.

³¹ Jaskáaxonra chonka rabé makan bia iki, ja westíora tsamá Jacobnin bakebotiibi, já iká iki Israel akin Ibon janea.

³² Ja makánbora Ibo jainxon yoina menoxonti tsamana iki; ja katemakinra jain jene ati taeshoko ayaketana iki, jain rabé chonka litro bimi bero napóti senen itiakin,

³³ jain karo tsamanxonra, waka bake bene kaxkepaxon jaki tsamana iki.

³⁴ Japekáora jaweti israelitabo jato yoia iki: —Chosko chomoki onpax bochoaxon, ja menoti namiki, itan ja karoki onpax chikokanwe —akin. Japekáora jawen rabé itin, itan jawen kimisha itin aribati jato yoia iki, jatianra jaskáakana iki.

³⁵ Jainxon yoina menoti makan tsamana katemaira onpax baita iki, ja taenribira jene bochoa iki.

³⁶ Jatian ja yoina moa menoira, profeta Elías ochómakiranax, saí ika iki: “¡Abrahamman, Isaacnin, itan Israelnin Ibo Diossé, rama jato onanmawe mia riki Israelnin Ibo Dios ixon, jainoax ea riki min yonoti ixon jatíbi jato onanmawe, jainxon jatíbi nato en akaira min ati yoia en akai iki!

³⁷ ¡Ea axonwe Ibó, ea axonwe, nato jonibaon mia Dios onannon ixon, jakiribi miki yoiti ikanon ixon min jato kenanon!” iki.

³⁸ Jaskatainbira, Ibon chii pakéxon, ja nami, karo, ja makanbo, mai poto jainoax ja taenkonía jene jatíbi jabo keyokin menoa iki.

³⁹ Jaskara oinnaxa jatíbi jonibo, mai tii anon kaman beotax, neskákana iki: “¡Ibora Dios iki, Ibora Dios iki!” iki.

⁴⁰ Jatianra Elíasnin jato yoia iki: —¡Baalnin, ikonma profetabo yatan-kanwe! ¡Tsoabi jabámayamakanwe! —akin. Jatianra jonibaon jato yatan-ketian, Elíasnin Cisón weain jato boá iki, jainxonra jato textea iki.

Elíasnin oi benon ixon orana

⁴¹ Japekáora Elíasnin Acab yoia iki: —Moa pixon, xeatanwe, oi kextó bei xoo ikaira moa ninkáti iki —akin.

⁴² Jatianra Acab pixón itan xei moa kaa iki. Ikaxbi Elíassa jawen yonoti betan Carmelo manan bochiki mapeta iki, jatianra main chirankooxon jawen ranboxo xarán jawen bemanan akax beota iki,

⁴³ jainxonra jawen yonoti yoia iki: —Aniparoori ointanwe —akin. Jatianra kaxon oinna iki, jainxonra yoia iki: —Jawebira yamake —akin. Ikaxbira Elíasnin yoia iki: —Kanchisaakin ointanwe —akin.

⁴⁴ Ja kanchis itinra, jawen yonotinin yoia iki: —¡Onora, mekentio ani nai koinshoko aniparomeax keyatai en oinke! —akin. Jatianra Elíasnin yoia iki: —Kamentanwe Acab yoi, jawen carro benxoax, oin chiteamatianbi moa katanon ixon —akin.

⁴⁵ Jatianra Acab, jawen carron nanetax moa Jesreelhain kaai pikota iki. Jaskatainbira, nai koinyabi niwe beaitian, nai yameta iki, jaskataxa ikon-biresi oi kextó bea iki.

⁴⁶ Jatianra Elías Ibon koshi menia iki, jawen chopa jakonhakin sawetaanan, Jezreel kaman ishtoi kaax, Acab noko-tamatianbi japari nokota iki.

Jezabelki raketi Elías jabata

19¹ Jawen xobonko nokoxonra, Acabnin, Jezabel, jatíbi ja Elíasnin akábo yoia iki, jainxon jatíbi ja dios Baalnin ikonma profetabo jaskáaxon jato texteabo yoia iki.

² Jatianra Jezabelnin, Elías yoiti westíora joni raana iki: “¡Mia Elías

iketianra, ea Jezabel iki! Abánon ea diosbaon akonbireskin masá tenemakin, ikonma profetabo min jato aká keská-ribiakin bakish nato horaribi en mia reteyamaketian”, akin.

³ Jatianra Elíasnin onanna iki eara onsá meran iki ixon, jaskatira mawá-kashamai jawen yonoti betan, Judáinoa jema Beersebain kaa iki, jainra jawen yonoti potabaina iki.

⁴ Japekáora tsoa jonibi jain jaama mananhori kaai, westíora nete Elías bain kaa iki, kaibira jain senenres kati atipanax retama jiwishoko naman yakata iki. Mawátinin keenira neskata iki: “Moara jainres iki, Ibó ea moa retewe, nokon anibo winoa jakonhi-rama riki ea”, iki.

⁵ Jatianra jain, ja retama jiwishoko naman rakatax oxaa iki, Jaskákenbira Ibon ángel jaiba joá iki, jatianra tii axon yoia iki: “Wenixon piwé”, akin.

⁶ Jaskáara Elíasnin já katemakin oinhaketana iki, jatianra jawen mapo-kiri, westíora pan xoi betan jarran onpax iká meraa iki. Jatianra weníxon pixón, itan xea iki; ja aká pekáora moa rakáribia iki.

⁷ Ikaxbira ja ángel joríbaa iki, jatianra tii axon yoia iki: “Weníxon piwé, min piamaabira min koshi moa yamati iki, mia jain kaaira ochóira iki”, akin.

⁸ Jaskáara Elíasnin weníxon, pixón xea iki. Ja jawékiatoninra koshi menia iki, jatianra chosko chonka nete, itan chosko chonka yamé, Ibo Diossen mananman, Horebhain kaman kaa iki.

⁹ Jain nokotax westíora shanka kini meran jikia iki, jainra yamé winota iki. Ikaxbira Ibonbi yoyo aka iki: “¿Elías, jaweakirin mia neno?” akin.

¹⁰ Janra yoia iki: “Mionparanan ikinra en ichabires shinanna iki, jatíbi atipana Ibo Diossé, israelitabaonra ja senenhabekonti joi min jato betan aká moa jene-kana iki, mia jainxon yoina menoxontibora moa ras akana iki, jainxonra min ikon profetabo espadanin jato retékana

iki. Eabichoresa banéke, jatianra rete-noxon ea benakanai”, akin.

¹¹ Jatianra Ibon yoia iki: “Jeman pikotax, ebebon manan maxkaten chankátanwe” akin. Jatianbira Ibobi winota iki, niwe koshiribira bea iki, janra manan shakona iki, Ibo bebonra shankabo toeta iki, ikaxbira Ibo ja niwenko yamaa iki. Ja niwe bea pekáora niwanna iki; ikaxbira Ibo ja niwanhin iamaribaa iki.

¹² Ja niwan pekáora chii ika iki; ikaxbira Ibo ja chiiain iamaa iki. Ikaxbi chii pekáo ninkatara kestenmashaman jakonshoko xoín ika iki.

¹³ Ja ninkatata, Elías jawen perakootinin bepota iki, jatianra pikotax, ja kini xemakainbi itoshia iki. Jainxonra jabi akí ikai joi ninkata iki: “¿Jaweki min jain akai, Elías?” akin akaitian.

¹⁴ Janra yoia iki: “Mionparanan ikinra, en ichabires shinanna iki, jatíbi atipana Ibo Diossé, israelitabaonra miibetan ja senenhabe konti joi jenexon jainxon mia yoia menoxontibo ras akana iki, min profetabora espadanin retekana iki. Eabichora baneta iki, jaskara ikenra ea retenoxon benakanai”, akin.

¹⁵ Jatianra Ibon yoia iki: “Jan mia joatoninribi banetax, ja Damascaino tsoa jonibi jain jaama mananhin katanwe. Kaxon, Siríain apo iti Hazael imatanwe.

¹⁶ Nimsinin baba Jehúra, Israel apo iti min janeti iki; jainxonra Safatnin bake Eliseo, Abelmehola jemamea, min toan ikon profeta iti min janeti iki.

¹⁷ Jaskáxonra jaweratoki Hazaelnin retekasa jabatai, jara Jehúkan reteti iki, jatian jaweratoki ja Jehúkan retekasa jabatai, jara Eliseonin reteti iki.

¹⁸ Jaskara ikenbira, dios Baal bebon chirankooyamabo itan ja betsó ayamaabo, kanchis waranka joni, reteyakin Israelhain en jato jamati iki”, akin.

Eliseo kenakaata

¹⁹ Jainoax kaxonra Elíasnin, Eliseo nokoa iki, mai karanbei iitaitian. Eliseo

bebonra iká iki ja teemati aká rabé chonka chosko waka benebo, rabébo kataxa kaai, chinitainoara janbi teemai iká iki. Jainoara Elíasnin, ochóma-kainxon ja Eliseo jawen perakootinin rakobaina iki.

²⁰ Jatianbira waka benebo jenebaini, Elías chibani ishtoi kaxon nokoxon yoia iki: —Ea manawe, enpari nokon anibo eara kaai akin en betsó abatanon, jatianra mia chibani ea mibé kati iki —akin. Jatianra Elíasnin yoia iki: —Miara kati atipanke, ikaxbi ja en mia akára min shinanti jake —akin.

²¹ Eliseoninra, Elías potabaini kaxon, rabé waka bene bia iki, bixon retexon kaxkepakea iki, jainxonra jan manexai jiwini nami xoixon jawen chonka westíora joni pimaa iki. Jato jaskaabaini kaaxa, Elías tee akinnai baneta iki.

Acabnin Nabot uva wai bichinna

21 ¹ Jawetio basi winota pekáora Jezreelhaino joni, jawen jane Nabot, ja Samariaino apo Acabnin xobo patax uva waia iká iki.

² Wetsa netenra Acabnin Nabot yoia iki: —Min uva wai ea meniwe nokon mai chité inon ixon, jara moa nokon xobo patax iki. Jawen toánra wetsa uva wai bebon jakon en mia meniti iki; iamax ja kopí koriki en mia meniti iki —akin.

³ Ikaxbi Nabotnin, Acab yoia iki: —Ja nokon anibaona en bia jawéki, en mia menitira Dios keenyamai —akin.

⁴ Jaskáara Akáb kikinbires onís itan sinata jakonma shinanni jawen xobonko kaa iki, nokon anibaona en bia jawékira en mia meniamai akin Nabotnin aká. Nokotaxa chikéki bekepiax rakata iki, itan pitinbobi keenyamai iki.

⁵ Jatianra jawen awin Jezabelnin já patax kaxon yokata iki: —¿Jawekeskatiiki mia kikinni onisai, itan min pikáshamai? —akin.

⁶ Jatianra Acabnin yoia iki: —Nabot betanra ea yoyo ike, enra yokáke jawen

uva wai ea maromanon ixon; iamax já keenketian jawen toan wetsa uva wai en meniti. Ikaxbira jan ea menikashamake —akin.

⁷Jatianra jawen awin Jezabelnin yoia iki: —Ikaxbi mia ikebetin, ja Israelbo jaskánon ixon jato yoiai! Wenixon pitanwe, moa jakon shinantanwe. ¡Enra Nabotnin uva wai mia bixonai! —akin.

⁸Jatianbira ja ainbaon, Acabnin janenko jato bomatibo kirika wishaa iki, jaskáxonra ja apon sellón apakea iki; jaskáatananra jain Nabot iká jemamea joni koshiboki bomaa iki.

⁹Ja kirikabo jato bomaara iká iki neskata: “Ayunani tsinkínon jato yoiwe, jaskáaxon jonibo bebon Nabot yasánkanwe.

¹⁰Jainxon rabé joni jansoi yoyo iti já bebon yasánkanwe, jaskáaxon Nabotki jakonmakin yoyo imakanwe, ikon riki natonra Dios betan apo jakonmakin yoiwe, iki imakanwe. Japekáora jemankonia pikoxon, wetsanko boxon makanman tsakaan maton reteti iki”, iki iká.

¹¹Jatianra ja Nabotnin jemamea jonibaon, jato ikinai joni koshibaon, itan ja jemamea kikin jonibaon, ja Jezabelnin jato kirika raanxonatonin ati yoiai keská akana iki.

¹²Ayunanti jato yoixonra, jonibo bebon Nabot yasánkana iki.

¹³Jatianra jansoi yoyo inon ixon rabé joni bekana joá iki, jatíbi jonibo bebo-meaxa Nabotki jakonmai yoyo ika iki, ikon riki, Nabothra Dioski itan apoki jakonmai yoyo ika iki, ikira ikana iki. Jatianra jemamea pikóxon makanman tsakaan retekana iki.

¹⁴Ja aká pekáora, Jezabel joi bomakana iki, Nabothra makanman tsakaan moa mawáke iki iká.

¹⁵Jaskara ninkatatianbira Jezabelnin, Acab, yoia iki: —Ja mia maromakashamai iibata, Nabotnin uva wai moa bitanwe. Nabothra yamake, ramara moa mawá iki —akin.

¹⁶Nabot mawata ninkatax, kaxonra, Acabnin, jawen uva wai moa iboakin bia iki.

¹⁷Jatianra Ibon, ja Tisbeainoa Elías yoia iki:

¹⁸“Ramabi ja Samariain jaa Israelbaon apo Acab betan, yoyo itanwe. Ramashokobira ja Nabotnin uva wainko iki, já moa iboakin bii kaa riki.

¹⁹Ja yoitanwe: ‘Bora neskatai: Nabot retexonra jawen uva wai min bichina iki, jakopira jainxon ochitibaon jawen jimi taxoainxon, min jimiribi taxokanti iki’”, akin.

²⁰Jatianra Elíasnin, ja Acab yoia iki: —¿Nokon rawí ixonbiki min ea nokoa? —akin. Jatianra Elíasnin aká iki: —Jenjén, enra mia nokoke, Ibonra oinke jakon ayamakin, jakonma jawé-kires min akai.

²¹Jaskara iketianra Ibon yoiwe: Jakonmabires rabinti jan miki raanai, mibébira jatíbi min rarebobo jato keyoi; Israelhain iká jatíbi min chiní bake benbobora jato mawámai.

²²Jaskáxonra, jatíbi min rarebobo en reteti iki, Jeroboam betan Baasakan rarebobo aníkeskaakin, mato jatixonra Israel ochamaa iki, jakopíra ea ikonbi-resi sinata iki.

²³Ja Jezabel yoiira Ibo neskáke: Ja Jezabelra, Jezreel main iká wainkoxon ochitibaon piti iki.

²⁴Ja min rarebo jemameax mawatabora, ochitibaon jato piti iki; jatian ja wainkonixax mawatabora pimis tetébaon jato piti iki —akin aká iki.

²⁵(Tsoabira Acab keska yamaa iki, jara iká iki jawen awin Jezabelnin jaskara ati shinanxona, Ibo bebonxon jakonmabires akai.

²⁶Jatonbi aká diosbo rabixonra jakonmabires jawéki aká iki, amorreobaon akai keskáribira aká iki, jabora israeli-taboibakea Ibon jato potaa iki.)

²⁷Jatíbi jaskarabo ninkáxonra, Acabnin jawen chopá noshia iki, jaskáaxonra xaxa chopá sawexon ayunana iki.

Ja chopayara oxaa iki, kikinbires onisa nia iki, moa jaskáwetsatimara shinanna iki.

²⁸ Jatianra Ibon Elías yoia iki:

²⁹ “¿Minki oinna Acab ebebonmeax namanbirestonin shinanmeeta? Já shinanmeeketianra, japariketian jawen rarebobo en masá tenemayamai, ikaxbira jawen bake apo iketian en masá temati iki”, akin aká iki.

Acab jaareskanti profeta

Micaíasnin yoia

(2 Cr. 8.1-34)

22 ¹ Kimisha baritia kamanra, Siriobo betan israelitabo reteananyamakana iki.

² Ikaxbi ja kimisha baritia itinra, Judáino apo, Josafat, Israelbaon apo Acab oinni kaa iki.

³ Jatianra Israelbaon apon, jawen joni koshibo yoia iki: —Matonra moa onanke, ja Galaadhainoa Ramot jemara noa israelitabaona iki. Jatian, ¿Jawekopíki non jawebi ayamai Sirio apon iboa ikenbi biribanoxon? —akin.

⁴ Jatianra ja Josafat yokata iki: —¿Galaadhain iká, Ramot jeman iká sontáro betan reteanani ea kaitianki, mia ebé katín kenti iki? —akin. Jaskáara Josafatnin yoia iki: —Ea ikaitianra ja nokon sontárobo, itan nokon kabayoboribi moa miibetan iki, jainoax min sontáro betanribi iki.

⁵ Ikaxbi kaamatianbi Ibon keenrin ixon onanoxonpari yokáwe —akin.

⁶ Jatianra ja Israelbaon apo Acabnin, ikonma profetabo jato tsinkia iki, chosko pachara ibirakana iki, jainxonra jato yokata iki: —¿Noaki iti iki, ja Galaadhainoa Ramothain iká sontárobo betan reteanani? —akin. Jatianra jabaon yoia iki: —Reteanankanwe, Ibon amaara min jatoaresti iki —akin.

⁷ Ikaxbi Judá mainmea apo Josafatkan jato yokata iki: —¿Nenoki wetsa Ibon profetabo yamaa, jaribi non onanoxon yokáti? —akin.

⁸ Israelbaon apo Acabninra, apo Josafat yoia iki: —Westíoraparira jake, já meranxon onannoxon Ibo non yokáti. Jara Imlakan bake Micaías iki. Ikaxbira en omisai, jawetianbira jakon jawéki ea jan yoiamai, jakonma jawékiboresa ea yoiái —akin. Ikaxbira Josafatnin yoia iki: —Jaskara yoiamawe —akin.

⁹ Jatianbira Israelbaon apo Acabnin, westíora sontárobaon koshi oficial kenaxon, yoia iki: —¿Imlakan bake Micaías, ishton jonon yoiwe! —akin.

¹⁰ Jatianra ja Israelbaon apo Acab betan ja Judábaon apo Josafat, reteanani jan panáti saweax, ja Samariain jikiti plaza ikainko apo iti yakátinin yakábekona iká iki, jatíbi ikonma profetabaonra rama iti joi bia iki.

¹¹ Quenaanákan bake Sedequíassenra, yami waka machan keska jaweti aká iki, jatianra saí ika iki: “¿Ibonra neskara yoike: ‘Nato machanbaonra kikinhakín jato keyoai kaman siriobo min jato reteti iki!’ ” ikibo.

¹² Jatíbi ikonma profetabaonra, ja apo jaskáakinbires yoikana iki: “Galaadhainoa Ramot jemanko iká sontárobo betan reteanankanwe, Ibon amaara maton jato jatoaresti iki”, akin.

¹³ Ja joi boai joni Acabnin raanatonra, Micaías kenai kaxon yoia iki: —Jatíbi ikonma profetabaonra, jatixonbishaman, apo jakonhakín yoikanke. Jaskara ikenra, en mia yokatai jatíbi jabo iká keskáribii jakonni mia yoyo iti, min yoia joi jakonribi inon ikax —akin.

¹⁴ Jatianra Micaíasnin yoia iki: —¿Ibon janenkora en ikon yoiái, ja ati Ibon ea yoiaresa en yoiti iki! —akin.

¹⁵ Japekáora Micaías apo Acab betan yoyo iki kaa iki, nokóketianra ja apon yokata iki: —Micaías, ¿Noaki iti iki Galaadhain iká Ramot jemankonia sontárobo betan reteanani? —akin. Jatian Micaíasnin yoia iki: —Jato peowe, minra jatoaresti iki, Ibon mia amaara min jatoaresti iki —akin.

¹⁶ Ikaxbi Acabnin yoia iki: —¿Jawetiakinki en mia yoiti iki, Ibon janenko onantiakin min ea ikonshamanres yoinon ixon? —akin.

¹⁷ Jatian Micaíasnin yoia iki:

“Jatíbi israelitabora en oinke, mananbotiibi janbisa, pastoroma carnerobo keská.

Jatianra ea Ibon yoia iki:

‘Jabora ibooma iki;

jakonnax jakiribi jaton xobonko moa bobatankanon’”, akin.

¹⁸ Jatianra Acabnin, Josafat yoia iki:

—¿Miaki en yoiamaa iki, nato joninra jawetianbi ea jakon jawékibo yoiamai, jakonma jawékiboresa ea yoiai ixon? —akin.

¹⁹ Micaíasnin yoiribia iki: —Jaskáakin min yoia kopí, Ibon yoia ninkáwe: Jawen ani yakatinin yakatara en Ibo oinna iki, jainoax naikanmea jatíbi ángel sontárobora jawen mekayao itan jawen mexkao já patax charókana iká iki.

²⁰ Jatianra jábo Ibon yokata iki, tsoamein paranshamanxon Acab shinanmai kati iki, Galaadhino iká Ramot jeman-konia sontáro betan reteanankin jato peonon ixon itan jainoax mawati kanon ixon. Jatíribibaon westíora jawéki yoiketianra, jatian wetsabaonbiribi wetsa jawéki yoia iki.

²¹ Ikaxbi westíora jakonma shinanra Ibo bebon kaax, en abátanon parankin iki iká iki. Jatianra Ibon yokata iki, jawekeskaxonki min ati iki,

²² Jatianra ja shinanman yoia iki, Acabnin jatíbi ikonma profetabo meranra jato jansomai shinan ea iti iki, Jatianra Ibon yoia iki, jaskáaxon min paranti iketian, moa atanwe, minra ati iki.

²³ Jaskara ixonra rama moa min onanke, jatíbi ja min, ikonma profetabora, Ibonbi ja janso shinanman jato paranti imake, jatianra jainres mia moa mawátí jake —akinra aká iki.

²⁴ Jatianra Quenaanánin bake Sedequíassen, Micaías nokobainxon

westíoraakin tantash axon, yoia iki: —¿Jan mia yoyo ati Ibon shinanki eiba-keax pikotax jawerano kaa? —akin.

²⁵ Jatianra Micaíasnin yoia iki: —Chitébotiibi joneti kawanhatanai netera min onannoxiki, jaweranoki kaa ixon —akin.

²⁶ Jatianra Israelbaon apo Acabnin jaskara ati jato yoia iki: —¿Ja Micaías yatanxon ja jemamea koshi Amón bebon itan nokon joni koshi Joás bebon boxonra maton presoati iki!

²⁷ Amón itan Joás yoikanwe, enra yoiai cárcel meran akanon ixon, jaskáxon ichamashoko piti, itan ichamashoko onpax menixon masá tenemakanwe, jatíbi jakonbires itan jiriapari ea joai kaman —akin.

²⁸ Micaíasninra tekibainkin yoiribia iki:

“jatíbi jakonbires isinama itan rakéyamai jakiribi mia jóára, emeranxon mia Ibon yoyo akama iti iki”, akinbo.

²⁹ Jatianra Acab betan Josafat jaton sontároboya, Galaadhain iká Ramot jemankonia sirio sontárobo betan moa reteanani bokana iki.

³⁰ Ikaxbira kaamatianbi Israelbaon apon Josafat yoia iki: —Onankanaketianra wetsa chopasaweax ea reteanani kaai, jatianra min nokon chopasaweti iki —akin. Jaskataxa Israelbaon apo Acab, wetsa chopasaweax onantimatax moa reteanani kaa iki.

³¹ Ikaxbi Siriainoa aponra, carromeax reteanani jawen kimisha chonka rabé sontárobaon koshi capitánbo jato yoia iki, Israelbaon apoma iketian tsobébi reteanantima.

³² Jatianra ja carromea sontarobaon koshi capitánbaon, Josafat oinxon shinankana iki, jara Israelbaon apo Acab iki ixon, jatskákinra moa rete-noxon katekana iki. Jatianra Josafat akinkanon ikax saí ika iki,

³³ Jatianra oinkana Israelbaon apoma iketian, moa chibankin jenekana iki.

³⁴Ikaxbi westíora sirio sontároninra, ja ati shinanxonmabi pia potaa kaxon, Israelbaon apo Acab ja mawátiaín-shaman jan panati sawea naxaranbi pian tsakaa iki. Jatianra jan carro boai joni yoia iki: —Moa banéwe, reteanantiainoa ea moa pikowe, eara kikinbiresakin tsakakanke —akin.

³⁵Ja netera ikonbiresi reteanankana iki, jatianra ja apo Acab, Siriobo betan reteanankin jawen carro napo chankanxon tewankana iká iki. Ikaxbira ja yantánbi moa mawata iki, ja tsakakanainoax jimi jokonaira, ja carro napo baita iki.

³⁶Jatian moa bari jikiketianra, sontáro joyotabaon ninkata iki: “¿Westíorabo jaton jeman, itan jaton main moa botankanwe,

³⁷moara apo Acab mawáke!” iki ikanaitian. Jatianra ja apo Acab mawata Samariain bokana iki, jainra miinkana iki.

³⁸Japekáora Samariain ianshokon ja carro chokakana iki, jainra tsini ainbobo nashiai iká iki, ochítibaonra Acabnin jimi taxoa iki, ja Ibon jaskati yoia keskára iká iki.

³⁹Acab jaskara winota joi, jainoax jatíbi jan akábo itan jawen marfil xobo, jainoax jan aká jemabo, jabora Israel apobo jaskara ikana yoiai kirikain wishakana iki.

⁴⁰Ja Acab mawata pekáora, jawen bake Ocozías, jawen toan apo jikixon jato ikinna iki.